

不便耳新纂之典雖緩數年官吏治事無所加損又以臣為不
得已焉者則雖待臣之終制而纂亦未為晚光景如流臣亦幾
月而終制乎又况大典之修曾命諸臣分科責成而六科亦各有
主者備知本末皆嘗先臣而受命者也如戶典不可無繼禧禮
典不可無希孟而今也二人亦皆遭喪若欲及期纂修則彼二
人者亦當起復臣痛鬱之懷即二人之懷也一舉之速而數人
不忍忘其親又豈非可悶之甚乎恭惟聖上以不忍之心行不
忍之政想念至於此不忍盡起之矣小臣可無而二人不可無
也同事一體之臣而或起或不又情之所難義之所阻也起復
之易物議必非之前日諫官之獻言亦未可忽也今此數人終
制之期亦皆不遠臣愚以為姑俟後日而纂庶副衆望茲事之
重臣非不知小緩亦無大害事合變通言當曲從豈可謂業已
有命勢難中止乎螻蟻微誠天日照臨伏望聖慈矜察勿謂臣
言全為一身更咨大臣以審可否特賜俞音俾遂愚悃不勝至
願不允○乙未日本國對馬州倭護軍藤茂家薩摩州持久使

者等來獻土物○臨瀛大君瑆奴上佐告江原道平昌人李為言
郡人前教諭劉得良欲於沙峴北造豐樂院作為文記因錄錦城
魯山等伴倘將謀為亂命囚李為及其從兄金牧于義禁府令
鎮撫李由義往寧越平昌等處捕囚劉得良及伴黨七十餘人
○丙申親享于文昭殿○鈴川府院君尹師路左叅贊朴仲孫啓
前日請罷洪約職傳曰予更商量近因齋戒未得復請臣等三復
思之約之罪關係宗社不可不罷不久○上與中宮御慶會樓下
設宴慰臨瀛大君瑆 王世子及內宗親判漢城府事沈滄仁壽
府尹沈決工曹叅判尹士昉禮曹叅判尹士昉刑曹叅議尹士昕等
入侍賜入直都鎮撫衛部將兼司僕宣傳官軍士等酒肉○日本
國對馬州宗虎熊瓦遣使來獻土物○丁酉左議政姜孟卿領
中樞院事李季甸梁山君李澄石左贊成黃守身左叅贊朴仲
孫中樞院使朴薑開城君崔濡漢城府尹郭連城等啓洪約罪
關宗社得保今日實天地再造之恩豈可及受爵祿御書答
之曰約可恕者凡四舊識一也不干二也功臣父三也年老已宥

四也孟卿等更啓約之得免誅責以至今日是乃殿下優待
舊識之至也當瑜初被責之時國人皆知瑜有貳心約亦以此
罷職宜自改悔反與瑜結黨數往來且會獵沙川豈可謂之不
干凡亂賊身無存歿人得而討之約之得免誅討亦已幸矣豈
可以年老而除職大抵功過不相掩前雖有功而後有罪則亦
未可免况其子之功豈能掩其父之惡乎今不可宥而宥之此
臣所以累瀆天聰而不能但已者也右司諫金從舜執義尹
慈等亦啓請傳曰卿等退而三思予亦三思○命同副承旨
成任往義禁府鞫李為金牧等○戊戌諭咸吉道都節制使楊
汀曰予念瓜牙之士被堅執銳戍禦邊方塞上無良醫良藥或
遇疾疹橫罹天札者間或有之予甚惻焉今送備急藥若干卿
宜令醫士隨證治療以副予仁愛黎元之意○己亥慶尚道觀
察使李克培進五岐麥穗○成均生員崔自濱等上書曰臣等
竊惟為國之道莫大於教養人材教養之道又在於師儒師儒
得其人則博典敷教培養國本人倫明於上小民親於下而王

道成矣此古昔帝王所以莫不建學立師以興化致理也恭惟
我本朝 太祖康獻大王應天開國首建成均館 列聖相承
丕闡文教今我 主上殿下以天縱之聖登君師之位躬行心
得以立教於上慎簡師儒以掌教於下繼天立極撫育人材之
意真與唐虞三代同一揆也前兼司成金鉤體聖上委任之意
教育人材為己孜孜教誨循循善諭能盡師儒之任宜示褒
獎之典反加朝請之 命臣等感焉以為老也則氣力未至衰
耄以為諸臣亦迭除罷也則學校之任不可一日無此人臣等
遑遑真得還職今已旬月未聞 休命敢瀆淵聰昔唐施士丐
為大學助教善講說秩滿當遷諸生愛慕上疏乞留天子嘉賞
而從之至於十九年之久不離大學至今為美談伏望收還朝
請之 命俾終教養之任於國家右文興化之道實為幸甚
御書答之曰朝請祿棄替之處迭為朝請出不得已雖然今看
子等之意實合予心嘉賞不已後當改授特賜酒般可會一歡
仍 賜酒五十瓶乾獐鹿各十口乾魚五十尾○庚子日暈○

辛慕華館觀射仍設酌宗親及判書以上入侍奉朝請金鉤承
名亦侍賜司僕內禁衛及扈衛軍士酒肉 命判中樞院事洪
達孫為大將習陣○辛丑平安道觀察使元孝然啓野人李豆
里與其徒五、六人賫其父滿住書到江界願朝且云中朝使臣
武忠、佟成等賫勅滿住古羅哈童倉羅郎哈等四人書去四月
初八日到建州衛等處武忠責我等叛中朝歸順朝鮮且問曰
汝於今春往朝鮮而還乎曰然又問自今以後亦敢往來乎答
云自祖先投順往來受職受賜後亦安敢已乎又問馬匹雜物
亦受之乎答曰然段子赫爾國所產唯受綿布麻布衣服耳武
忠等將率滿住古羅哈等四人赴中朝滿住病以其弟阿古乙
代遣且四人等各率子弟八人向遼東皆議云到朝鮮當告以
自來交隣往來耳豆里又言中朝之所以如此者以童倉管下
李于哈往訴也吾等與童倉疾于哈但彼族類多欲殺而未得
也節制使洪興祚諭以中朝勅諭我國之意只給糧益送還○
成均生負崔自濱等進箋謝恩箋曰離日中天肇開文明之運

需雲霈澤偏蒙寵渥之隆喜溢儒林光增簡策竊念臣等螢雪
末藝學海微瀾講學芹宮共被樂育之化獻章楓陛敢望允俞
之音又况寵賚之榮濫及狂簡之輩雲壘九醞香浮雨露之恩
玉俎八珍綺錯乾坤之惠沈酣醺骨顧眎生輝茲盖精一執中
終始典學法周雅之多士豐芑澤深稽軻書之樂育菁莪教義
遂令駑質特荷鴻私臣等敢不抱義飲仁洗情滌慮手舞足蹈
載賡早麓之詩日升月恒倍申皇齡之祝○司憲府啓朴汝踈
薄正妻昵愛婢妾罪應杖九十從之○癸卯諭平安道觀察使
元孝然都節制使具致寬曰今得書具悉若李滿住使人更來
則當語之曰前日汝等賚來書及接待武忠之事已馳啓殿
下聞之深嘉汝等向慕之志愈確仍設酒饌厚饋之如有需索
當優給米鹽綿布等物但令彼不知出朝命若又童倉使人
來亦依此例隨宜厚接益堅彼歸附之心○甲辰諭諸道觀察
使曰箭竹須經二年斫之可中於用緣斬刈無度使軟弱不堪
用又如竹席竹枕皮竹箱等物雖係進貢之物無益於用自今

勿復進除民家私養箭竹外諸邑公處竹林觀察使差人禁伐
培養諸邑貢竹毋得擅伐必報觀察使觀察使審經年久近方
許刈取違者論以制書有違律又道內箭竹產處一一搜訪以
啓令該司置簿培養勤慢遣人摘姦卿亦巡行時或親見或差
人檢察○吏曹啓巨邑教官並差文臣從之○丙午御慶會
樓下觀射宗親議政府六曹判書以上諸將承旨等入侍○忠
勲府更請洪約罪重不宜叙用命還收告身○震中和郡人
吳貴興降香祝行解恠祭○丁未御慶會樓下觀射內宗
親及判中樞院事洪達孫禮曹判書洪允成兵曹判書韓明澮
承旨尹子雲李皎然成任等入侍○戊申大雨命注書往典
獄義禁府審獄內漏濕○洪允成以母大祥歸忠清道鴻山令
觀察使備給母及祖父母外祖父母墳奠且賜宴于其父濟
年○遣上護軍具信忠奉奏本如大明奏曰天順三年四月初
十日陪臣金有禮賫捧到勅諭該禮部奏稱得王咨有日本國
差人盧圓等到本國傳言國王源義政說稱比先差去進貢使

人失禮蒙朝廷恩諭放回已將本人科罪今欲差人赴京謝罪等因然本國僻在海隅去京路途寫遠其情真偽難以遥度必得其實然後可信勅至王即拘集本國來人盧圓等詳審前項傳說事情如果真實無偽轉行源義政知會朝廷以爾既能悔過自新恭修職貢准令擇遣謹厚老成識達大體者為使來朝其通事亦須選委謹慎知禮人負伴送尤須嚴加戒約往來中途不許生事擾人若或以前犯法無禮搶掠財物欺陵官府罪必不宥王其仔細審實停當而行毋得忽略欽此拘集盧圓等備說勅諭事意具問情為本人答言即與前說無異得此轉令源義政知會○己酉京畿觀察使金連枝進三歧麥穗○是日大雨三更 命開迎秋門令闕內諸司夜直負及入番內禁衛別侍衛等各騎司僕馬受宣傳標信分往五部審水邊人家及傾危家舍令移接他處 庚戌忠清道觀察使黃孝源進四歧麥穗○上欲觀稼于城南車駕已備尋停曰待晴觀稼○重創淨業院 命給今年慶尚道輸貢布價以供其費○有如屍斷右

臂棄于昭格殿洞口 命義禁府刑曹漢城府同鞫之榜曰告
者良人除職賤者給賞竟未得○咸陽安置玆病死○賜錦山
安置瓔及妻光州安置鄭棕及妻三節衣服○六月辛亥朔
幸西郊觀稼仍御麻浦讓寧大君提新亭 御書名其亭曰榮
福亭註其下曰榮一世享百年 命左議政姜孟卿作序兵曹
叅判金淳都承旨尹子雲左承旨金礪右副承旨李皎然等賦
詩賜大君米五十石又 賜扈衛軍士酒肉○諭全羅道觀察
使金世敏曰予聞順天府軍資去三月失火盡燒此事匪輕卿
何迨今不啓乎其速啓失火之因燒穀之數仍 傳于承政院
曰遣朝官推鞫罷府使朴延世職○壬子日暈○御慶會樓下
觀射宗親宰樞承旨等入侍 召成均生貞崔自濱李孟賢等
講易學啓蒙自濱孟賢頗通大義 命自濱進酒令吏曹除自
濱孟賢等職○兵曹據咸吉道北青甲士趙季孫等狀啓六鎮
邑城行城並令石築慮人物貧困限十年阜盛間令北青軍士
春秋赴防其後內廂閑良充補衙前并七百戶充立而軍裝馬

世宗皇帝卷之六
二十四
匹未備姑以此青軍士助戰赴防因此限年已過至今二十六
年每一年二度赴防特為失巢今六鎮石城完固士卒富強又
無聲息請自今依南道諸邑例一年一度赴防 從之○兵曹
啓軍政可行條件一京中諸司皂隸螺正諸色人定額外稱為
差備諸邑亦有額外書員日守役使故生齒漸繁而軍額不加
多請中外號牌成籍後盡刷預差皂隸螺正諸色人及數外書
員日守無役人增定侍衛牌一甲士別侍衛忠順衛忠贊衛去
官年少人等無屬處閑遊扈翼衛乃衣冠子弟入屬散官職去
官處也請上項無屬處不堪東西班叙用者皆屬扈翼衛計番
上日月滿十月加資從三品而止其中東西班遷轉者通計扈
翼衛月數加資且東西班受職作散而自願入屬者亦依上項
例一軍器監弓絃製造不精易致斷絕自今監造官及匠人依
繅鍊軍士條罪之兩界所用弓絃則以生絲送諸鎮令守令監
造亦依上項例置簿科罪一訓鍊觀軍士會處而暑雨祈寒無
入接之處請於本觀東北隅空地造行廊十餘間 從之○刑

曹啓富寧府甲士李崇敬逃避本邑築城習陣等事守令拿鞫
抗拒罵辱罪應杖一百破家瀦宅黜鄉從之○日本國王遣
使來獻土物及佛像三軀○癸丑御思正殿引見源義政使者
僧秀彌等二十人上曰書契辭意予已具悉所求大藏經當
委送仍命秀彌等進酒謂都承旨尹子雲曰此僧志尚清潔
其飲食居處須要潔精○以沈澮判漢城府事權攀藝文提學
花山君鄭軾刑曹參判金鈞同知中樞院事魚孝瞻中樞院副
使沈決仁順府尹曹孝門大司憲柳洙文城君兼全羅道都監
制使黃孝源商山君兼忠清道都觀察使李克培廣陵君兼慶
尚道都觀察使金從舜刑曹參議李克堪右承旨李皎然左副承
旨成任右副承旨尹士昕同副承旨魚得海行僉知中樞院事
兼慶尚左道慶置使金得禮司諫院左司諫大夫李孝長右司
諫大夫申末舟右獻納宋文琳司憲持平○乙卯大雨御書
傳旨刑曹曰近日霖雨過多必有滯囚傷和氣者京外獄囚奸
盜外杖八十以下盡放以上年老者保放○兵曹啓宣傳官不

謹入直侍衛諸事以無檢覈故也請依部將例本曹考其勤慢
褒貶從之○丙辰日暈○倭司正有羅多羅等來獻土物○
刑曹啓他人牛馬買殺者自己牛馬宰殺者知情放賣者一依
元典及受教杖一百身充水軍而盜殺牛馬者則依天順二年
三月日傳旨杖一百刺字徒三年蓋徒年有限而充軍者終
身不返若是則盜殺之律反輕於買殺宰殺請自今盜殺者亦
杖一百刺字身充水軍從之○丁巳時霖雨不止命行祈晴
醮禮于昭格殿又命錄囚可赦可保授者并速移文諸道○
司憲府啓忠義衛金孝卿疎薄正妻昵愛妓妾罪應杖九十
上以功臣之裔原之只收告身○戊午行祈晴祭于名山大川
○兵曹啓忠贊衛五品逆兒本依忠順衛而設然忠順衛入屬
者或白身參外並無前仕數年之內輒受五品過於猥濫故限
三年去官若忠贊衛則參上參外有前仕者並令入屬而六品
以下始自初年次次呈都目受職元職六品者則有前仕而不
得呈都目沈滯者多請元職六品者自今年六月呈都目授五

品從之○己未 傳旨承政院曰宗親宰樞功臣等請醫者
毋得自占內醫○兵曹啓初中武舉者或除訓練觀祭外官或
差本官權知越一年各二人去官其餘並分屬甲士仕路不廣
加以甲士分十一番至四年不得番上致使壯勇者老於鄉曲
請自今武舉有屬處去官者外並於別侍衛甲士分半差定以
廣遷轉之路 從之○刑曹啓北青使徐浚以府民高玄等
暴揚過失訴於觀察使杖玄致死律應斬待時 上以功臣
原之只收告身徵埋葬銀安置于全羅道咸平縣○庚申 御慶
會樓下觀射會文臣講書左議政姜孟卿右議政申叔舟右贊
成權學吏曹判書成奉祖戶曹判書李承孫兵曹判書韓明澮
刑曹判書朴元亨工曹判書李邊僉知中樞院事金何同知中
樞院事金鈞魚孝瞻行上護軍金末兵曹參判金淳吏曹參議
任孝仁承旨等入侍○兵曹啓文武一體而文科則分屬承文院
三館每年十人去官隨才除職武舉則除有屬處人外並屬訓
鍊觀權知又屬甲士去官之路不廣且去官之後或置散或送

西無闕不叙特獎勵無方文武科等是科目而轉遷用捨之
法頓殊軍器監職掌戎事宜任武士請訓練觀權知等依祿官
取才例試取中格者及觀祿官中人器相當者四人依奉尚參
外官例授軍器監直長錄事兼差訓練參軍常任本監越一年
三人去官去官後勿令無故置散從之○辛酉咸吉道敬差
官康孝文馳啓今兀未車兀狄哈也當其育帖應哥等男婦十
九名從麻尚哈到慶源今五月二十三日臣與楊汀招兀良哈
幹朶里諸酋與也當其等同饋也當其等與五良哈自相酬酢
告天約和其所擄來男婦共二十七人給還且前者申叔舟在
慶源集諸鎮諸酋刷還兀狄哈人物諸酋皆來獨孛兒罕難病
不赴及申叔舟還囑楊汀令遣通事開諭之孛兒罕子於兒哥
禿及姪月郎哥遇通事於路月郎哥彎弓欲射於兒哥禿遽止
之且問因何事來通事答曰將與兀狄哈和解招汝等來也又
孛兒罕道遇通事其族人浪明家等二人亦引滿於兒哥禿月
郎哥等又止之孛兒罕問委來之由通事答之如初孛兒罕云

朝鮮將發兵擊我遣汝等詞吾出慶爾

李兒罕素熾楊汀且不

朝鮮將伐諸種又作木契相傳欲煽動搆釁

通事云儻疑間牒可遣人探候李兒罕

云昔在庚寅安乙貴與阿古車交親及間窺詞尋引兵馬殺虜

妻子殆盡汝等所言實未可保通事云汝子伊升哥近侍輦

下愛護甚篤豈有是事李兒罕云安知汝國先殺我子乎前者

富寧兵馬審虛水刺道路我等皆懷疑慮分軍望侯今四月十

五日即是寅日野人俗忌寅日豈不疑慮並令妻子登山耳遂不來前

此叔舟令富寧府使吳益昌審虛水刺賊路故李兒罕借以為

辭訂累遣人招之亦不來且言子阿兒哥秃所擄兀狄哈刺斡

里者因所喂馬斃惑而自縊後當親告事由是後猶遷延不

來必有其情臣見楊汀文移令會寧府因便招致若來則李兒

罕外並皆囚鞫臣謂李兒罕為人性本陰譎必是不欲還所虜

人物多般詭詐若遽加威脅非唯無益於和解將招朋儻或背

聖化則安知環鎮野人舉皆如此臣觀東良北無兒界舍地等

處野人不靖之勢必自李兒罕唱之也○諭咸吉道都節制使

楊汀曰今觀康孝文所啓知卿遣人招浪字兒罕托辭不來卿
令會寧府招浪字兒罕等若來則字兒罕外囚禁鞫問字兒罕
無禮若繩以法則不得無罪然浪子野心豈可一一以法繩之且
與卿有隙卿當從權處置自然誠威夙著彼必祗服不須深慮
也更宜靜以鎮之令諸部寧一○壬戌 上謂承旨等曰今武
士已精鍊文臣講習亦所當務其令年少聰敏者讀中庸或問予
將親講焉禮記皆載日用常行之事不可不力學而世儒多不
喜讀讀了中庸後亦令讀之○文昭殿舊用鍍金銀酒器壞令
工曹改造 上議諸政府曰君子雖不以天下儉其親然鍍金無
益不如純用白金也遂令勿鍍○諭平安道觀察使元孝然
都節制使具致寬曰今野人來者諸處戍將各自接待開諭則
慮誤事機可令沿邊戍將依舊送于滿浦使江界節制使主管
○傳旨義禁府曰申自繩家奴謁同告自繩杖殺其妹注音生
以奴訴主事干綱常其推鞫以啓○元狄哈也堂其等三人來
獻土物○癸亥 傳旨義禁府曰前監察南份妾子惇中失

致傷其鞫事因以啓○判洪州牧事李明晨卒停朝市 賜賻
致祭謚康平溫柔好樂康治而無眚平明晨連姻戚里有吏幹
○甲子吏曹啓前此大殿別監小親侍并五十二人各品適兒十
五丁丑年減九只置六一年兩都目遷轉然其適兒不與他處
別監和會又非加設祿科請一年四都目除授從之○陞慶尚
道青松郡為都護府以 昭憲王后內鄉也○諭忠清道觀察
使黃孝源曰卿體予恤民之意盡心撫字政聲流布予甚嘉尚
吏民上書請留卿予嘉實惠不違民情留卿卿雖有老母程途不
遠任卿來往相見益務著功○乙丑 御慶會樓下設宴觀射
讓寧大君禔孝寧大君補臨瀛大君璆誠寧君裊益寧君祿桂
陽君增義昌君玗密城君琛翼峴君璵寧海君瑋雲城府院君
朴從愚延昌尉安孟暉鈴川府院君尹啓左議政姜孟卿右
議政申叔舟判中樞院事李仁孫梁山君李澄石行僉知中樞
院事趙惠左贊成黃守身右贊成權擧兵曹判書韓明澮判中
樞院事洪達孫左叅贊朴仲孫吏曹判書成奉祖戶曹判書李

承孫刑曹判書朴元亨工曹判書李邊大司憲曹孝門戶曹參判安崇孝禮曹參判尹士昫兵曹參判金淳刑曹參判鄭軾工曹參判尹士盼兼成均司成金鈞金末承旨等待引見倭使者僮秀彌等二十五人元狄哈也堂其等三人令侍宴 賜宴卓于成均館又 賜儒生等酒肉并賜男樂○兵曹啓諸道觀察使節制使處置使新舊替代時發兵符依虎符例交割具由以啓又令守令萬戶僉節制使具發兵陰符接受事由報觀察使節制使處置使轉啓 從之○兵曹啓捕盜者論賞給到之法大輕故詐偽之徒聞有捕盜者則爭相賄遺詭稱共捕多至百餘人官吏莫辨真偽率移該曹一據給到因此軍士怠於宿衛濫得仕到奪勤士宿衛者都目至為不當大抵捕盜之功人衆則易力寡則難請自今十人以下共捕則給到三十人以上則給到二十二十人以上則給到一十捕強盜者二十人以上共捕則給到一百三十人以下則給到九十以次為差若迹知為首者給到三十如此則論賞得中庶無冒濫之弊從之○兵

曹據忠清道觀察使黃孝源啓本啓號牌成給時姦偽甚多未能悉辨隱丁者壓良者冒認他奴為己奴者流亡未見者盜賊在逃者如此之類頗多未成籍時刷出為難今已成籍若考牌面所居州里容貌年歲戶首則刷出不難然而未聞京外有丁現捕者此實京外官吏及各坊管領各里正長等視國法為文具全不檢覈所致請自今管領正長等各於掌內新到接者無牌者痛察告官俾考根脚並還本處若不現告因他後現則勿論赦前後官吏及許接戶首管領正長並論以制書有違律從之○丙寅持平李永垠將本府議啓忠清道觀察使因其道百人等狀仍等不遘此門一開則効此者多臣等以為不可御書答之曰若黃孝源自請速遘而遘之則有弊此予特嘉賞有效又因民情有何弊乎永垠又啓 賜酒肉于成均足矣又賜樂于文廟之側臣等以為不可 御書答之曰成均賜樂有何不可若於孔子殿作樂飲酒則雖予不得焉明倫堂則予所作樂處又使臣作樂處何嫌之有况男樂尤為正大設若賜女

樂亦不妨豈有國家不廢之物邪於成均而正於朝廷朝廷則
謂之邪而用之為常成均則謂之至正至大尊於朝廷之所而
不可用邪物乎然則事理甚乖漸不可長所言甚無謂也史臣
論曰謹按帝王為治之道聖賢教人之法皆以禮樂為本舜命
夔教胄子禮曰學樂誦詩是未嘗去樂於學校之中也今夜特
賜酒於成均又賜樂以侑之是重儒教養之意而深慰之
乃一時之盛舉也如或賜以倡優之類戲於文廟之側宜乎言
矣○諭咸吉道都節制使楊汀曰元良哈幹朵里等擄掠兀狄
哈人孩或作妻或作奴婢或多給牛馬財物買得今從國令不
敢爭而還給其心可嘉卿與孝文磨勘以其虜來人物壯弱買
價多小及還給時情勢輕重分為三等一等給軍資米七石二
等五石三等三石前後和解時聚會聽令往來有勞如尚同介
管婁把兒歹婁時哈等亦以情勢輕重分為三等給米如上麻
尚哈能再度往來抬來給米十石其隨從往來二度者給七石
一度者五石且各諭以上旨以褒獎又以上項論賞之人於今

冬野人上送時為先上送○丁卯燕成均司成金鉤等上箋謝
恩箋曰乾坤大度曲加生成鉉輟微才獲露優渥佩銘曷已糜
粉難酬伏念臣等蒲柳孱材雕篆未藝叨承 藝眷猥側縉紳
之班濫居臯比徒守章句之訓愧之絲毫之補常恐尸素之譏
意殊尤之私遽踰生平之望九重宮醞濃舍雨露之恩列案珍
羞誕降雲天之澤况聲樂之特賜乃前昔之所稀茲蓋剛健粹
精聰明睿知橫經問道陋漢帝之臨雍敬德慎儀體魯侯之
在泮右文之化既至養老之禮亦隆遂令庸愚得紆寵幸謹當
策駑希驥磨鈍生鋸嘉與青衿載賡歌於醉飽恒輸丹懇倍祝
筭於康寧○傳旨刑曹曰霖雨過多必有冤滯以傷和氣予甚
慮焉精密寃獄囚徒可保放者及徒流付處人以啓○傳旨禮
曹曰霖雨過多咎實在予民未蒙澤而冤枉者必多自六月十
八日停供上及外方進膳又令三品以上極言得失無所隱諱
時重創淨業院訓練院使庾智以為農月不宜督民興役上封
事留中不報○司憲府啓醴泉郡民成富告其父為郡吏林才

勝山等杖殺郡事趙敷恐其農月後民事露謀欲掩覆不即追捕林才等將官中米布雜物贈成富助葬請依律科罪上以功臣原之只收告身配慶尚道密陽府尋命釋之○戊辰大

雨城中水漲平地水深四五尺江水亦漲人多漂沒右議政申叔舟啓臣伏覩傳旨以久雨為災責躬減膳不勝悚惶自念

臣以庸劣特蒙謬知濫擢調燮之任既無以參贊化育近以久病又不能奔走夙夜以貽聖慮天苟為災咎實由臣伏望亟

免臣職以塞天譴不允○傳旨刑曹曰近日霖雨過多必有

滯寃以傷和氣予甚慮焉京外十惡強竊盜外罪囚並皆赦

○傳旨義禁府曰靖難以後亂臣等緣坐男夫內各其未成丁

者待滿十六歲決罪人及保授人等並放送永為庶人外方從

便女人內除原係賤口外各處賜給良女自願贖身從願施行

且其中男夫原係公私賤者令各其官主依他役使安置人慶尚

道山陰趙枚全羅道興陽任敬義定役人江原道淮陽甲得敬

鐵原孟孫充軍人江原道襄陽金雄虎全羅道珍島朴俗流人

江原道淮陽金龍咸吉道富寧金幹生鍾城金珣慶尚道固城
鄭得賢河東鄭同泗川洪山付慶人全羅道龍安禹繼蕃外方
災使人李樛材李三老李承命金石公崔千齡奉忠孝河經義
張和等放遣○傳旨司憲府曰付慶人慶尚道固城柳衍江原
道原州柳孝班流人咸吉道鍾城王以德等放遣○傳旨刑曹
曰充軍人京畿右道井浦鄭今黃海道康翎韓孝生等放遣○
司憲府囚人崔命全金巖等以赦見放憲府啓命全侵虐其妻
全巖兄弟不睦罪干綱常請勿放 從之○召戶曹正郎權瑊曰
諸道貢物代納之價無定數民多苦之其速磨勘以啓○諭平
安道觀察使元孝然節制使具致寬曰建州等衛野人如有
出來欲上京者令江界節制使考同封事目內辭緣開說○已
已祈晴于昭格殿 宗廟社稷北郊○舍人李季專將本府議
落夏月時雨大行雖久不霽未為災也請速收減膳之旨且亂
臣緣坐時未成丁保授人等並皆放送臣等以為其中或有不
可赦者 御書答曰敬慎自損乃求祥之道况水上漂流人有

樂乎入曰政府所謂不可赦者何等人歟有所指歟其磨勘以
聞○庚午大雨○知敦寧府事李滄卒停朝市滄時遭喪自咸吉
道還路值大雨至高山驛前川其子先渡漂溺滄就授之亦隨
而溺滄啓川君登之子中壬子科累遷至正二品謚文良學勤
好問文溫良好樂良○辛未大雨設祈晴道場于慶會樓下○
癸酉 御思政殿受常參視事臨瀛大君璆永膺大君瑛村陽
君增義昌君玘密城君琛翼峴君璉寧海君瑋烏山君澍延昌
尉安孟聃鈴川府院君尹師路左議政姜孟卿右議政申叔舟
左贊成黃守身右贊成權學判中樞院事洪達孫同知中樞院
事金鈞禮曹參判尹士昫工曹參判尹士盼行上護軍金漑承
旨等入侍 命孟卿進酒 傳曰霖雨過多慮有傷和之事使三
品以上各陳所言兩相默無所陳反以德位不稱不能調燮辨
免當國之災退而不顧是豈大相之事古人亦言顛而不扶持
焉用彼相卿之所言甚無理焉仍罰以酒 御慶會樓下觀射
○命減瓦窰貢納燔瓦木丙子年以上未收○義禁府啓百戶

朴已隨趙武英如廁往來於金仲廉處且覘武英所持可疑之物有無以報仲廉初諱武英欲見刑房吏金自呂之言竟服之然以武英刺項後不省人事於證之則必無自呂相見之說又武英刺項事不即告於夜直官黃允元而與仲廉大叫况初則曰告允元以武英項血出之因未知後則曰武英自手刺項前後異言可疑也金自呂初告允元只曰武英仆卧於南行廊西隅再告曰武英衣血染又從允元到武英處搜刀子也而諱之與允元供招不同可疑也仲廉金紐趙選等初與武英同囚一處有日矣武英刺項之夜出庭中過夜必有情由况武英刺項後急呼仲廉等雖相訟者以兄弟叔姪之親不即救護有乖情理且仲廉等各令奴子每日聚宿府門外此等事狀可疑 命收仲廉紐選等告身付處于外已自呂並充軍○甲戌戶曹據兵曹閻啓自京中至諸道沿路諸邑凡倭野人往來及軍情緊急事甚多費用倍他而軍資不敷請自今沿邊諸邑軍資並限千石儲備 從之○傳旨禮曹曰予欲多印法帖廣布國中如進趙

學士真筆真草千字等書者從願厚賞又如書屏簇法帖摹刻
後深主以此曉諭中外○乙亥日暈○諭諸道觀察使曰近者
霖雨為災損傷禾稼漂沒人命予甚軫慮已令京中三品以上
各言得失然四方之廣萬民之病朝中之臣豈能盡知守令近
民之任必審知民之利病宜令各陳民瘼無有所隱足以知其
賢否觀察使亦以所見陳策以副予恤民之意○戶曹判書李
承孫啓請遣分巡御史于諸道糾察守令斷獄以釋冤滯○丙
子命左議政姜孟卿右贊成黃守身左叅贊朴仲孫中樞院
使朴董禮曹叅判尹士昫都承旨尹子雲往英陵奉審主脉
頰圯處○傳旨漢城府曰五部城底十里水邊人家內漂沒家
基及水侵家舍其速審以啓○議政府落靖亂後亂臣錄坐待
年保授者及曾已為奴者請勿放從之○丁丑御慶會樓
下觀射○罷宦官安璐尹得富尹彥等職收嚴敬之告身充軍
囚入番宦官飯監等于義禁府鞫之以不謹奉職也○義禁府
啓申自繩奴謁同訴其主濫殺其婢罪應絞待時從之○傳

旨義禁府曰官奴永屬宦者茂朱鄭存寧海柳漢珍島劉進濟
州金潔盈德吳栗山等放送還給家產從仕珍島金革鄭福趙生
巨濟李孝智李春文仲善南海李岡康津化繼山河東安遇祥金
山黃思義固城朴存壽南海崔峯旌義黃義之朴漢泗川金德
恭咸悅李澗咸從金從直等自願外方移永屬木川崔濕外方從
便○戊寅 御慶會樓下觀射引見兀狄哈也堂其槐道夫乙洪
吾等 賜也堂其具鞍馬一匹綵段袂帖裏紅絲帶綵囊刀子
弓矢槐道夫乙洪吾等各綿布袂帖裏紅絲帶綵囊刀子 傳
曰爾妻子等待汝等久矣其速回還○賜讓寧大君提益寧君移
各內廐馬一匹又令提與兼司僕金彛射彘屢中 賜弓一張
蓑衣一領○傳旨義禁府曰官奴永屬人濟州辛以中巨濟朴
搗謙南海成九淵昆陽洪澤寶城曹柱慈城揚子濡等自願外
方移永屬安置人金海成燻成照成然等自願外方移安置○
命戶曹具養蠶除件頒諸中外戶曹啓一依山有桑木郡縣每
一道或十邑或二十邑一年相違并二邑養蠶曾已立法若守

令多植桑木盡心布置則雖非山郡亦能得効始今年桑椹成
熟每於諸邑築二三斗擇地苗種待其成長各其境內路傍及
官舍倉庫墻底菓園楮田凡宜桑閑曠之地依方移種錄其株
數轉報本曹本曹啓聞如有虛張株數不能培養守令則推覈
科罪一在前每邑給蠶種一張取真絲二斤然慮其邑有大小
人物多寡有異令諸道觀察使考其諸邑殘盛蠶種張數酌定
報本曹始庚辰年分送蠶種一無桑木諸邑則始今年栽植待
二三年盛長後依上項例分送蠶種一平安咸吉兩道初以土
薄非宜桑之地植桑養蠶之事並不措置然平安南道及咸吉
諸邑桑木茂盛養蠶民戶頗多始今年於兩道諸邑依上項栽
植例待二三年成長後觀察使酌定蠶種報本曹計張分送一
諸邑養蠶時採桑人除村民使以入番人吏日守官奴婢蠶母
則公處婢子能養蠶者監考則品官中勤謹者擇定養蠶取絲
上納該司轉報本曹本曹考其勤慢其中能養得繭絲多者蠶
母賞以米布監考復戶或從願褒賞有不能養蠶得絲最少者

監考蠶母並依律科罪且守令勤慢觀察使每於殿最憑考施行一諸邑爭務多得繭絲分給蠶種數外加備多養或盡摘民間桑葉或役農民若繭絲不足以官中之物貿易民間作弊者憑公處養蠶養於衙內作弊者啓聞科罪一諸邑限桑木茂盛每年具栽植桑木之數報本曹一每年養蠶後取種張數具報本曹一民間栽桑大戶三百株中戶二百株小戶一百株不能者家長及守令並科罪○己卯御札諭楊汀曰卿再勞于外念之日篤卿亦必思射侯之場予欲速見卿而方和解事大非卿莫竟故陞資賜卿角弓十竹一千仍留鎮北卿勿嗔予○諭咸吉道都節制使楊汀敬差官康孝文曰昔年僉知中樞院事李巨乙加介弟時羅孫妹姐姐等為兀狄哈搶去今兀狄哈與兀良哈釋仇其所掠人口悉相解送上項時羅孫等前日者體察使申叔舟在慶源時語育帖應哥訪問率來如未率來則所
在慶聞見來告今育帖應哥再來其說云何於兀狄哈出來酋長慶備細更說使之刷還○擇文臣司憲持平李永垠承文院

副校理鄭孝常世子司經李淑城仁壽府丞閔粹奉常錄事魚
世兼戎均注簿李克均承文院著作魚世恭世子右正字許琮
成均學諭金宗碩權知承文院副正字金宗直等並除閑官讀
書仍賜中傭或問各一件

世祖惠莊大王實錄卷第十六

世祖惠莊大王實錄卷第十七

秋七月庚辰朔 傳旨義禁府曰安置人巨濟李孝宗興德李季町付處人白川趙選放遣○革咸吉道預原郡屬于定平府○辛巳 御慶會樓下觀射內宗親及左議政姜孟卿右議政申叔舟右贊成權學判中樞院事洪達孫漢城府尹鄭連城兵曹判書韓明澮都承旨尹子雲左承旨金碩等入侍 上與孟卿等議點諸道軍丁以領中樞院事李季甸為京畿都體察使京畿觀察使金連枝忠清道都巡察使判中樞院事洪達孫全羅道都體察使禮曹判書洪允成慶尚道都巡察使左贊成黃守身江原道都體察使中樞院事朴薑黃海道都巡察使○忠清道觀察使黃孝源上箋謝 恩箋曰鶴書屢降眷遇非常篤力難堪震兢無已榮喻望外感與愧并伏念臣猥以孱資叨承重寄顧之涓埃之補累蒙綸綍之音任情歸寧足慰倚問之望有時入覲俾遂捧日之誠豈期密勿之辭遽及庸愚之品殊恩若此前古所稀茲蓋伏遇盛德在躬至仁育物政先懷保視民

如傷度廓包容與人不備謂小臣未遑將母怜小臣每欲觀光
遂令謫材獲遇寵命臣敢不馳驅原隰誓帶礪而益堅瞻仰雲
霄祝岡陵而彌切○壬午李季甸黃守身洪達孫金連枝朴董
等議點軍事目以啓○以朴仲孫為議政府左叅贊成奉祖右
叅贊具致寬吏曹判書李承孫戶曹判書尹士昫工曹判書李
邊中樞院使金世敏知中樞院事沈滄判漢城府事辛碩祖開
城府留守李允孫戶曹叅判黃孝源禮曹叅判李克培兵曹叅
判元孝然刑曹叅判權摯工曹叅判安崇孝同知中樞院事兼
忠清道都觀察使韓瑞龍同知中樞院事閔塞同知中樞院事
兼京畿都觀察使尹士盼金連枝中樞院副使任孝仁中樞院
副使兼江原道都觀察使李延孫中樞院副使兼全羅道都觀
察使李純之仁壽府尹金淳慶昌府尹兼慶尚道觀察使沈決
仁順府尹金光晬漢城府尹咸禹治司憲府大司憲鄭守忠河
原君康衮信川君兼忠清道都節制使金從舜吏曹叅議黃石
生兵曹叅議金得禮刑曹叅議金脩行僉知中樞院事兼黃海

道都觀察使趙之唐宋處儉僉知中樞院事李好誠行僉知中
樞院事兼慶尚左道都節制使李茵僉知中樞院事兼慶尚右
道處置使朴炯行僉知中樞院事兼慶尚右道都節制使庾智
司諫院左司諫大夫李云奉右正言鄭軾咸吉道都觀察使曹
孝門平安道都觀察使楊汀咸吉道都節制使金慶禮平安道
都節制使李孝誠忠清道水軍處置使薛丁新全羅道水軍處
置使尹垠判廣州牧使舊制家在本道或父母居者不許除觀
察使都事淳家在慶尚道而得拜殊例也○議政府請停諸道
分巡御使 從之○癸未傳旨禮曹曰五子登科父母歲賜米
二十石歿者追贈令所在邑致祭○甲申 親傳秋享祭香祝
○司憲府啓今因水災禾稼未稔而分遣諸道軍籍使且捕鷹
事委之觀察使守令亦可辦也若以進獻事重不得已設遣則
每道不過遣一採訪令或遣二人或三四人騷擾州郡弊固不
小季季町李孝宗罪關宗社不宜輕宥 傳曰軍籍事非汝等
所知採訪事係進獻不可停止季町孝宗以大臣之故議諸大

臣而放之何害季町李季甸之弟孝宗李邊之子也○乙酉兵
曹啓虎翼衛並衣冠子弟請依別侍衛例分屬虎賁衛入直其
軍裝馬匹每月番上時本曹與都鎮撫點閱從之○論京畿
忠清全羅慶尚江原黃海道觀察使曰我國戶籍不修因此軍
籍不明豪者多自影占弱者子立無助民不聊生今遣大臣修
明軍籍但欲矯積弊耳非欲盡刷隱丁以充軍額也愚民必不
知國家之意或致驚懼卿預先曉諭毋使駭擾○臺諫更啓李
孝宗李季町不宜輕宥不允○丁亥李灌之孫祐上言歲戊
戌祖灌與朴習同時被罪今習子孫已許通仕路乞依此例許
今赴試從之○賜兵法于宣傳官等令讀之○賜日本國使
者僧秀彌成道記○戊子復行成均館春秋等課試優等者
直赴會試之法○禮曹啓文臣三品以下依舊例每春秋仲月
會于議政府試表箋或古律詩等第啓聞置簿三為首者進秩獎
勵其不赴試者囚家僮再不赴則科罪三不赴則罷職從之
○己丑刑曹據京畿觀察使啓本啓廣州甲士河閏生怒其邑

守差賑恤官凌辱罵詈平安道泰川郡人方直慢罵邑守且稱
前守任寬為賊人訴之姦惡莫甚雖經赦不可不懲請並依法
瀦宅黜鄉 從之○庚寅 御書下承政院曰霑雨過多予甚
軫慮其令減膳徹樂○兵曹據慶尚道節制使啓本啓安東府
雖為巨鎮非他東萊延日有軍士諸鎮例不必置軍官若勾當
軍情公事時選用鎮印請鑄送安東鎮三字印他如全羅道羅
州長興光州南原全州慶尚道蔚山昌原大丘晉州星州尚州
忠清道公州忠州洪州天安清州京畿水原廣州揚州江華開
城府黃海道海州黃州遂安江原道江陵原州淮陽春川平安
道平壤成川安州定州龜城義州朔州咸吉道安邊永興咸興
等諸鎮亦依安東鎮例鑄給 從之○辛卯 御思政殿受常
參視事內宗親及議政府六曹判書以上入直諸將承旨等入
侍京畿都觀察使閔騫慶尚道都觀察使金淳辭 賜見召成
均直講李永垠承文院副校理鄭孝常世子司經李叔城成均
注簿李克均仁壽副丞閔粹成均學諭金宗碩等 親講中庸

○壬辰左獻納朴續祖將本院議啓本月初三日吏曹判書成奉祖子慄三寸姪李鐵堅四寸弟成重識知曹事尹子雲女婿鄭沃三寸姪申潔正郎李文煥兄文炯正郎朴健妻三寸叔崔曦佐郎崔漢輔妻父趙安孝四寸弟許琮等不計相避授職三館去官時授准職例也而承文院博士金自貞降授行副司正具人文拜陰城縣監不赴任法當三年不叙而還授京職臣等以為有違於法 傳曰此皆予之所知也○癸巳 御慶會樓下觀射內宗親及兵曹判書韓明滄承旨等入侍○義禁府啓金牧李為誣告人謀亂牧應斬為杖一百流三千里 從之○遣災傷敬差官于京畿忠清江原黃海道○甲午 奏聞使書狀官姜耆壽遷到義州高進江游之溺死 命其兄司僕少尹眉壽往收骸骨○禮曹據咸吉道觀察使關啓武經七書已令校書館刊印貿易本道道里遼遠雖有志讀武經者不得來貿請送武經十八件于本道使之講習 從之○乙未禮曹啓判中樞院事李仁孫子克培克堪克增克墩克均五人登科率漢

城府尹李士寬子義長禮長智長誠長孝長恕長六人登科而
父母俱歿請依曾降 傳旨仁孫歲賜米二十石士寬追贈今
所在邑致祭 從之○日本國對馬州宗盛家遣使來獻土物○
丙申謝恩使行上護軍康純行大護軍李石弓等來自大明石
亨言中國唯城郭高壯而已其餘文物皆無足貴聞者譏之○
咸吉道敬差官康孝文馳啓浪孛兒罕與月郎哥阿兒哥禿等
來鍾城臣謂孛兒罕云胡不率所擄兀狄哈刺斡里以來乎雖
稱自縊豈可信哉孛兒罕曰吾何誣敬差官誣敬差官乃所以
誣朝廷也吾雖欲掩覆其如隣里耳目何今葬虜在焉不是虛
妄指天為誓又曰諸種野人所擄兀狄哈人物我當以為己任
招誘率來臣又云汝辱蒙國恩位至中樞汝前日告都節制使
曰吉州斜麻兒洞口子非要害之處故都節制使使富寧府使
往審之此事實出汝之所言汝何反生疑惑孛兒罕曰果吾前
日所言年既老耄又無知識以至於此皇恐謝罪臣又云汝子
伊升哥近侍蒙恩甚重待汝父子實出等夷汝何向本國通事

驍弓欲射援引庚寅年事以至分軍候望乎以此觀之朝鮮軍
馬出來訛言必出於汝口也李兒罕及履辨明臣云中樞豈妄
言况悔過乎訛言不出於汝則月郎哥者欲射我通事此必為
訛言者我將鞫問情由繩之以法李兒罕叩頭哀乞云此人驍
弓非真欲射纔與隣人飲酒大醉相詰適逢通事作驍弓勢耳况
胡人逢人則驍弓相戲常事也訛言亦非出於此人固請放之
臣答云此人罪重汝不得私請我不得私釋妻子之心尚未能
測汝焉知姪子之心臣觀李兒罕容辭訛言實出於李兒罕而
鞫問月郎哥則必吐露情實以此固請勿鞫臣鞫問月郎哥月
郎哥亦自辨不服尋亦放之○兵曹啓兩界甲士職窠闕有數
因此充補甲士等雖累年防戍例當受職而不叩除授誠可憐
愍請自今充補滿七年防戍者依內地正軍防戍例除散官職
及其實職當次則從下除授從之○兵曹據忠清慶尚全羅
道都巡問賑恤使韓明澮啓本啓沿邊諸邑國家藩籬受敵初
直也而其人民或稱船軍或稱鎮軍移屬他邑本邑則無守禦

軍卒雖褊小殘邑不可不置鎮如慶尚道盈德清河興海長鬐
金海機張鎮海固城巨濟昆陽河東南海全羅道光陽樂安寶
城康津海南靈巖珍島務安咸平臨陂咸悅忠清道舒川
庇仁保寧結城海美瑞山唐津沔川等諸邑防禦最緊請並設
鎮其守令職銜稱其鎮節制使僉節制使各自為鎮其軍卒則
悉除內廂及諸鎮赴防者各屬其邑稱鎮軍且曾設無軍巨鎮
如慶尚道蔚山昌原全羅道光興忠清道洪州等諸邑亦
依上項例置鎮分二番防戍內廂及諸鎮軍士則令其道觀察
使刷出內地諸邑加現閑良人漸次充定若諸浦船軍則慣熟
舟楫人勿令除下上項諸邑侍衛牌及甲士別侍衛忠順衛近
仗防牌攝六十諸司諸真等軍士下番時則勿令統屬巨鎮各
屬其邑某鎮脫有事變隣近左右鎮相為救援其不能救援守
令以軍機失律論若慶尚道蔚山昌原全羅道康津忠清道海
美等邑則都節制使本營所在其內廂防戍軍士仍舊其餘屬
其邑又於上項置鎮諸邑加現閑良人令所在邑盡刷加定其

邑鎮軍與元定軍士和會防戍又令其道都節制使具諸邑騎
 步兵數啓聞錄籍送于本曹且慶尚道蔚山柳浦則防禦最緊
 今當置鎮軍卒除下時本浦曾赴防者盡除而無他戍卒不可
 請以本浦連境慶州蔚山兩鎮當番軍士五十名內廂赴防當
 番軍士二十名抄定擇有武才四品以上廉謹者都節制使軍
 官數內口傳定為本浦權管令都節制使檢察能否褒貶啓聞
 周年後考績叙用 從之○吏曹啓咸吉道洪原以北野人地
 面防禦最緊守令不宜挈家赴任請依五鎮例滿三十月代遞
 且邊邑學文者本少而又以不學無才行者差教導甚為不可
 請自今以文臣有才行者差遣勸勵 從之○丁酉以沈滄判
 中樞院事李仁孫戶曹判書李承孫判漢城府事權摯戶曹參
 判李允孫工曹參判鄭從韶司諫院左獻納○戊戌奏聞使吏
 曹參判曹錫文戶曹參判權摯等賫 勅回自大明 勅曰先
 因邊將奏報王與建州三衛頭目交通朝廷以傳聞之言未可
 遽信因此遣使賫勅諭王今得王回奏交通事情具悉察王所

言似為當然不以為已過故特再勅諭王王其明聽朕言毋忽
王以為欽遵勅旨事理許其往來但宣德正統年間以王國與彼
互相侵犯所降勅諭欲令釋怨息兵各保境土未嘗許其往來交
通除授官職且彼既受朝廷官職王又加之是與朝廷抗衡矣
王以為除官給賞依本國故事此事有無朕不得知縱使有之
亦為非義王因仍不改是不能蓋前人之愆也王欲和隣保境
理固宜然而除官給賞事實未當王之明達豈不自知且童山
等王以為有獸心者今彼乃能自知其非俱來輸情服罪而王
素秉禮義何為文過飾非如此然春秋責備賢者况朕以至誠
御天下豈可外王而不言但事在已往朕不深咎自今以後王
宜謹守法度以絕私交恪秉忠誠以全令譽庶副朕訓告之意
欽哉○御思政殿引見奏聞使曹錫文權執等內宗親及左議
政姜孟卿右議政申叔舟兵曹判書韓明澮衛將沈決金漑李
埤及承旨等入侍設酌出內樂以慰之賜軍士酒肉○禮曹據
司譯院都提調單字啓曾棟儒生年少聰敏者十三人講隸漢

訓令文臣五人為訓導然訓導等各牽本司事務又未解漢訓全不供職遂使儒生廢業請罷文臣訓導更選明習漢訓者為訓導且文臣習讀官等以講隸漢訓輪次赴京而慢不加意尤為不可請自今每三日一仕習業每節季具錄任日及所學勤慢以啓又啓成均館風化之源其任最重而指館員為閑官或差他任或以窠闕不足數易因此不得專務訓誨學生亦不得專心受業請選經明行修諸生所推服者二人俾久其任以次陞授本館之職皆從之○己亥承政院奉 旨馳書于咸吉道敬差官康孝文曰今得浪孛兒罕服罪事具悉賞米當從優給之然此等事在爾臨機布置不可一一取旨以致稽緩○庚子承政院奉 旨馳書于平安道觀察使曰予之赴燕京時護送軍士及隨從人等具錄姓名以啓居喪物故者並啓○兵曹據平安道節制使啓本啓本道燧卒役滿九年者依咸吉道例啓聞授散官職 從之○辛丑 御慶會樓下觀射讓寧大君禔孝寧大君補桂陽君增寧海君瑋鈴川府院君尹師路河東

府院君鄭麟趾左議政姜孟卿右議政申叔舟左贊成黃守身
右贊成權擘左叅贊朴仲孫右叅贊成奉祖梁山君李澄石領
中樞院事李季旬判中樞院事洪達孫禮曹判書洪允成刑曹
判書朴元亨吏曹叅判曹錫文戶曹叅判權摯兵曹叅判李克
培戶曹叅議李承召禮曹叅議徐居正承旨等八人 引見日
本使者秀彌等 賜佛經召文臣鄭孝常等八人 親講中庸
或問又選甲士二十七人射侯仍饋酒肉○乙巳 御思政殿
臨瀛大君璆及禮曹判書洪允成衛將沈決金漑承旨等八侍
引見判中樞院事李季旬刑曹判書朴元亨戶曹叅議李承
召命季旬元亨進酒 賜季旬及咸吉道觀察使鄭軾等馬粧
各一部○義禁府啓南惇為嫡母殺無根口不可道之言罪應
絞待時 命杖一百永屬濟州官奴○推刷提調啓京案付諸
司奴婢或逃亡或流移住居外方者多因此奸狡之徒避重就
輕服役京中者日減然強令還役則窮乏之人不能自立必至
逃散請刷京中無族親不堪役使者錄外案納貢其餘並令還

役從之○丙午承政院奉旨馳書于咸吉道觀察使曰今去浪伊升巨賜紅青木綿各五匹燒酒五十瓶鹽十五石米十石及魚物如有所索亦量宜給與又諭曰賜宴于伊升巨之父孛兒罕及兄弟卿其備給○遣刑曹判書朴元亨戶曹叅議李承召如大明謝恩表曰皇恩溥博庸瀆懷柔睿訓溫諄深切感佩粉身難報鏤骨何忘伏念臣猥將孱資幸逢熙運叨守釐東之任恒輸拱北之誠顧緣穢俗之與隣但知安邊之寔急事自妄作罪實難逃詔忽頒於十行淵冰罔措悔無及於萬死天日有臨方虞嚴譴之加敢望具宥之降徃既不咎誕布寬大之恩來許自新昭示丁寧之誠感蒙私於再造庶圖報於一生涕隨言零情由中激茲蓋伏遇心敦字小量廓包荒遂令庸材獲紓殊眷臣謹當益殫素節痛改前愆不二不三虔候度於永世時萬時億祝聖壽於齊天方物表曰天心至仁特荷恩眷壤奠雖薄聊表謝忱謹備黃細苧布二十匹黑細麻布三十匹黃花席一十張滿花席一十張雜彩花席一十張人參一百觔雜色馬二

十匹右件物等製造匪精名般甚數冀諒由中之懇俯容享上
之儀 皇太后禮物紅細苧布一十匹黑細麻布二十匹滿花
席一十張雜彩花席一十張中宮禮物同謝皇太子箋曰望尊
儲貳密裨皇猷志篤順承導先睿眷佩銘不已糜粉難酬伏念
臣幸際昌辰叨襲先業誓謹守於屏翰期無負於絲毫乃緣敝
封誕隣頑俗異杜陵侮之憲自底罪愆遽承勅諭之頒曷勝悔
懼方竢重譴敢望隆私既加寬貸之殊恩且示諄切之丕訓豈
惟微臣之感實為舉國之歡茲益伏遇德著英明心專翼亮憐
小邦事大之懇體上聖柔遠之仁遂令庸資獲蒙洪造臣謹當
歌載賡於重潤祝恒貢於千齡禮物白細苧布一十匹黑細麻
布二十匹滿花席一十張雜彩花席一十張雜色馬四匹元亨
承旨等辭 賜衣服帽靴等物○日本國對馬州倭護軍平家
以子而難洒也文等二人來獻土物○丁未兵曹據慶尚道觀
察使啓本啓尚州洛西常平龍山等三驛使客往來稀少又無
文書遞送等事洛陽洛平等驛使客絡繹轉輸不絕日漸凋敝

請合洛西于洛陽驛龍山常平于洛平驛 從之○命除燔造

珠王之禁前此以盜用焰燭禁之○戊申 御思政殿受常察

視事輪對內宗親及六曹參判以上承旨等入侍工曹參判李

允孫以江原道觀察使適還復 命名見謂左右曰予體中不

平未堪進酒然今日允孫來須設酌仍遍 賜酒謂允孫曰卿

觀察江原字撫民物予甚嘉之予謂今年水災江原為甚民必

阻飢允孫對曰嶺東禾穀稍盛嶺西諸邑被水災為甚全失農

業且橡栗亦無民甚病焉 上曰本道地品如何對曰嶺東地

稍肥饒嶺西磽薄歲易耕之○命停諸道點軍使○傳旨戶曹

曰平安黃海江原三道之民或因年荒或因疾疫或因徭役乘

移他道者甚多人稀地廣沃壤多荒地有遺利予愍民失樂土

寄生他鄉者雖欲還故鄉而勢難自致雖非流民欲就閑曠之

地而難於始業故已令平安黃海江原三道新徙者給復七年

且優給義倉米穀新墾者免稅五年又給諸邑農牛農器官墾
陳地以待來者隨其情願給付使民知樂土之利國無曠地之

愛予亦將往來平壤為東西都以存撫之且黃海道疾疫已息
新徙者亦多樂業江原道亦省講武場以業武其曉喻中外使
百姓知予至意○己酉禮曹據咸吉道觀察使關啓慶源住良
女仍火伊痛其夫金仁得癩疾累年聞邑人魏永弼言即斷指
和藥以救其心可嘉請依國典旌門復戶從之○八月庚戌
朔日本國對馬州宗盛家遣使來獻土物○上與中宮御內殿
引見宰樞講宗親經書 召河東府院君鄭麟趾入內設酌○
辛亥左議政姜孟卿左贊成黃守身右贊成權肇左叅贊朴仲
孫右叅贊成奉祖禮曹判書洪允成工曹判書尹士昫等啓昨
鄭麟趾在 上前語涉無禮罪在不赦請下該司推鞠情由
傳曰麟趾無禮非自今日每被酒如是何足責也且內殿私會
之事不可聲言孟卿等更啓凡人於朋友之際當相敬以待之
况君臣之間乎彼必常畜不敬之心故屢發於言安可以內殿
之事而私之請明正其罪傳曰麟趾功臣不可加罪當台麟
趾於卿等坐中質責使自知過孟卿等更啓功臣小失猶或可

赦若不忠不孝之罪則不可以私赦且法者天下古今之所共
非人主所得而私之也麟趾罪關不敬死有餘辜請抵罪勿赦
傳曰親見卿等深責麟趾遂御慶會樓下觀射讓寧大君禔孝
寧大君補永膺大君琰桂陽君增義昌君五順城君諱寶城君
容新宗正孝伯孟卿守身擊仲孫奉祖允成士昫承旨等入侍
召麟趾親責諭之命罷職孟卿等更啓麟趾之罪雖收告身外
方付處亦幸矣但罷其職臣等缺望即 命義禁府收告身外
方從便○御後苑示觀稼圖于諸臣 命製詩以進○傳旨禮
曹曰宗親通經書免就宗學者其除月講○壬子右正言李云
奉將本院議啓昨 命收鄭麟趾告身外方從便臣等未知其
由 傳曰非爾等所知云奉更啓麟趾之罪今雖未知先此屢
犯不敬之罪請明正其罪 傳曰今已區處勿復言 御慶會
樓下觀射 賜內宗親議政府六曹判書都鎮撫承旨等兒馬
各一匹○向化浪伊升哥妻從兄崔適密啓伊升哥妻言伊升
哥欲往中國預備行裝有日今必因浴遂往父處前此伊升哥

請暇往吉州溫井治病發程已數日矣。上召右議政申叔舟及兵曹判書韓明澮議李兒罕父子罪不可赦。命以兵曹正郎吳伯昌為咸吉道敬差官往囚李兒罕父子家小鞫問扇動浮言使諸部落登山又欲射通事情狀執伊升哥於所到處送于京李兒罕性最兇狡累嗾諸種寇我甲山等處每現說兇謀脅我當。世宗朝遣伊升哥入侍伊升哥尋還。文宗累召不至及。上靖難以後諸種皆歸順李兒罕復遣伊升哥入侍上厚待之建州衛李滿住諸子及童倉等來朝李兒罕嫉之始有缺望之心吳伯昌賈去。御札事目一名李兒罕時勿誘致與酋長雜召之既至囚李兒罕父子語諸酋長以李兒罕之罪一語李兒罕扇動之罪則諸酋恐緣及推問或致騷動宜又語之曰李兒罕前日申叔舟在慶源招諸酋時造為浮言托故不來其罪獨當他無所及。○癸丑地震于忠清道報息懷仁槐山清安清州燕岐文義沃川青山息津石城全羅道南原任實淳昌潭陽王果降香祝行解恠祭。○忠勳府啓鄭麟趾罪大宜削

功臣籍 聖恩寬貸但令外方從便罪大罰輕請加罪之 傳
曰醉中之事不足論也又啓雖因酒失不敬莫大其於勲籍不
可不削 不允○甲寅忠勲府又啓麟趾但收其職外方從便
是退休于家適以自便而已非所以懲惡也請加罪以戒後來
固請數四 不允臺諫亦請治麟趾不敬之罪 不允○司憲
府啓禁令可行條件一市肆令該曹量宜分地使不得亂雜以
杜欺罔一用惡米者令兵曹義禁府發吏捕之只罪賣者吏卒
能捕告者給到十五一攘殺雞犬者依律刺字後收贖其中成
黨持杖者良人外方充軍公私賤口永屬殘弊站驛轉運奴有
能捕告者軍士依捕告竊盜例給到餘人將犯人收贖充賞一
私窰燔瓦造作不如法者本府及漢城府檢察論罪其瓦沒官
一上項犯禁者限風俗歸正間並以制書有違律論 從之○
乙卯日暈○丙辰左議政姜孟卿啓臣同里人別侍衛李堦去
夜為賊所刺請搜捕 命分遣宣傳官部將鎮撫搜之不得問
堦則曰我為弟址所刺遂搜址房內得血染衣捕址而來 命

囚義禁府○戶曹啓軍資監米豆專為軍需而蓄積年久將至紅齋廣興倉歲納米豆即皆頒祿有違用舊蓄新之意請自今以廣興倉所納諸道米豆移納軍資監換以陳米豆從之○丁巳親傳社稷祭香祝○御思政殿謂都承旨尹子雲曰李瑊被刺事狀予已知大槩然事在可疑得情甚難其速問址妻且昨政院何不先問址妻乎對曰良家婦女當取上旨而後招問未及取旨故未敢耳上曰已命宦者令先問址妻宦豎不傳耳政院須速拿址妻及辭連人詳鞫以啓○戊午御慶會樓下觀射內宗親議政府六曹判書判中樞院事洪達孫承旨等入侍○命釋吏曹參議金從舜正郎柳季藩李文煥佐郎崔漢輔李仁堅判承文院事洪逸童博士高台翼副校理李丙奎各就職先是勅書至命承文院勿幾從舜等見本曹吏所騰寫不以聞并逸童等下義禁府○左司諫庾智執義尹慈等上疏曰臣等竊謂分莫大於君臣罪莫大於不敬臣而犯不敬之罪則豈可容於天地之間哉鄭麟趾學古人之書知君

臣之分非他不學無知者之比也而屢犯不敬之罪是豈過誤
我不敬之心常積於中而輒見於外也 殿下曲垂寬仁置而
不問是宜改心易慮以報 殿下再造之恩也尚不悔悟復蹈
前轍不敬之罪口不忍言只令從便安坐鄉間有何以憚而懲
戒哉臣等以為不敬無禮不赦之罪也曲法輕論一時之恩也
豈可以一時之私息輕論不赦之罪哉伏望 殿下斷以大義
明正其罪 不允○已未吏曹判書具致寬啓今年自六月以
後連雨不霽損傷禾穀平安道田穀專不穀穗水田又為風摧
請今年姑停損實敬差官令首領官察訪等審驗 命戶曹議
之戶曹請如致寬所啓 命停京畿江原黃海平安咸吉道敬
差官○御慶會樓下觀射讓寧大君禔臨瀛大君璆永膺大君
琰桂陽君璿義昌君玗翼峴君暉密城君琛雲城府院君朴從
愚鈴川府院君尹師路順城君謹寶城君容新宗正孝伯判中
樞院事洪達孫禮曹判書洪允成行上護軍河友明兵曹參判
李克培漢城府尹鄭連城承旨及兼司僕等入侍 賜禔馬一

匹○命孝寧大君補判內侍府事田昫都承旨尹子雲等巡私第擇處女為王世子嬪也○奏聞使先來通使孫壽山上聞見事目曰詣陳嘉猷第問朝賀時服色嘉猷曰 皇帝皮弁皂袍 皇太子翼善冠紅袍羣臣公服汝殿下具遠遊冠絳紗袍世子翼善冠羣臣公服可也○傳旨戶曹曰曾命諸邑軍資穀每十斗取息四斗自今依社倉法減二斗○庚申承政院椽吏韓義孫告僧弘胤言國家興亡之事 命往捕之弘胤逃閉城門搜之未獲移文于諸道追捕○辛酉諭忠清道都觀察使安崇孝曰右贊成權擘往浴忠州安保温井其賜營米十五石及食物若欲役人亦聽○賜懿敬世子守墓官鄭守忠鞍具馬一匹侍墓內侍申雲馬一匹○戶曹啓諸處代納貢物已令聽民情願而守令及幹事僧等不體本意雖民間可備之物並皆代納貽弊不貲請自今如有勒令代納者守令幹事僧重論 從之○壬戌戶曹啓本曹版籍田案會計文書所係匪輕蔽之樓庫與人家相接火災可慮請量撤旁近人家 從之○癸亥 御

書傳旨兵曹罷忠順衛○傳旨工曹曰進上鞍子毋用金銀飾

○甲子 親祭文昭殿 幸慕華館宗親六曹參判以上隨駕

觀騎步射甲乙槍習杖放砲 賜侍衛軍士酒肉○兵曹啓入

直將士宿衛及令軍行巡節次一設東南西三所令軍士入直

諸將受點分所一都鎮撫衛將各三人入直一抄入番司僕內

禁衛諸衛軍士作獅子衛其衛將除入番都鎮撫諸衛將外可

當宰樞等前夕本曹抄啓受 點受牌入直中所一把門軍士

分屬三衛一行巡分更本曹入省記無定式且諸衛受分更牌

於本曹入直堂上一本曹於都鎮撫所移文外有緊急事牌台

郎官鎮撫面說都鎮撫所於衛將所同一外所入直鎮撫及本

曹郎官等承宣傳標施行一本曹都鎮撫所內外軍士摘莪時

用摘莪牌本曹則摠統都鎮撫所則分統一諸衛則無所巡察

然警衆不弛兵家所貴或 命大臣或命宗室或命本曹或命

鎮撫所或命內官或命司謁司鑰以至賤隸若受宣傳標信而

往則率及伍長以上不告將帥而奉 命若大將傳令標信則

令其部將而已如此各令其次而已部將不聽大將之令統將不受衛將之令皆以此例一延秋門郎官鎮撫一人入直宮城諸門用宣傳標信開門一內禁衛不隸五衛其節制使三人稱內禁衛將設衙門每番一將率入直一疊擊大鼓時於勤政殿庭具形名各占其方一都鎮撫衛將不可同處一把門甲士雖本義與衛分隸他衛後不復屬義興從之○乙丑日本國對馬島主宗成職遣皮古汝文等來獻土物一歧州倭司正藤也三浦羅等亦來獻土物皮古汝文上關處鎮守秦盛幸回荅書契曰粵承聳道安琉球之禮核於當州盡被奪取之旨頻訢之是即欲令當州而違背大國之義謀略悉惟虛說也道安今隔海程千里居住他國故生擒以不得令渡之太守成職發憤千萬難避心中者也於自今以後而如此妄語虛說姦曲之輩被留置大國急急示賜定自太守可被待厥過者乎安巧專察微薄進上大刀三振照領多幸○司憲府遣吏及皂隸于兵曹點察使令六十等數判書韓明澮來啓上曰憲府不當於軍門

擅自摘姦

命囚執義尹慈持平宋春琳李崇元等于義禁府

○賜司諫院酒肉○丙寅

御思政殿視事引見倭人皮古汝

文等六人設酌○左議政姜孟卿以覲母晉州辭引見賜酒

命鈴川府院君尹師路餞于漢江○漢城府啓續典謄錄內諸

司奴婢遺失之物不難徵者令各自徵毋得移文本府近者諸

司官吏雖瑣屑之物亦皆移文徵之至為煩擾請依六典施行

從之○丁卯雨雹○命釋執義尹慈等就職○兵曹啓別侍

衛元額五千分三番一年相遞而憚於終年番上托故者多番

上之數不過三四百其已番上者芻糧不給或稱身病親疾直

呈上言續續下鄉宿衛日踈請自今分二番六月而遞遞兒仍

舊一番番上侍衛仕到十一月初十日至計十五日呈都目二

番五月初十日至計十五日呈都目春秋孟月各一等給祿

從之○吏曹據長湍人民狀告啓凡州府郡縣以民戶多少差

等稱號今長湍縣合臨津臨江兩縣民戶多至一千二十二戶

不可稱縣請升為郡從之○戊辰以昌為壽城正尹士所戶

曹參判權摯工曹參判金末行中樞院副使李允孫漢城府尹
李孝長吏曹參議金從舜承政院同副承旨李芮僉知中樞院
事○御慶會樓下觀射內宗親及申叔舟具致寬韓明澮承旨
等入侍○日本國關西道周坊州多多良別駕教行遣使來獻
土物○戶曹啓諸邑軍資米穀已減取息之數但軍資義倉米
穀元不別置故分給時受者與守令皆不識某倉所出吏緣為
姦致令愚民受弊請自今守令每分給時別錄某倉穀幾斗給
受者帖亦然收納時憑驗又令觀察使摘姦如有混雜載錄者
罪守令從之○己巳別賜日本國對馬州宗成職慶尚道
米一百石○御札下承政院曰予欲省作蠶書以便觀者使易
舉行親披數日雖有可省之語亦不可太省且此一卷之書非為
浩汗難窮但其中誤句訣誤注釋者須要校正刊行如是則欲
全觀者全觀省觀者省觀天以我國人才輕改古書必致甚錯
反不如存古之愈也遂命行大護軍梁誠之考校○庚午日
本國九州都元帥源教直遣使來獻土物○命右承旨李克堪

世子弼善洪應撰前代女訓以進○辛未諭京畿忠清慶尚全
羅道觀察使曰讓寧大君禔往浴東萊温井厚待之一次設賜宴
○戶曹據黃海道觀察使啓本啓今歲失農非但黃海道如京
畿江原平安道皆然飢饉流移中路轉死者或有之所至邑必
視為他邑人民不加救恤請令諸道觀察使知會諸邑流移人
民過境時或病或飢者許監考里正即告官錄其根脚保授所
至民戶官給食物救恤待麥熟還本守令不能救恤者科罪又
今年大水傷稼覆沙之田亦多田少者必至飢餓一應徭役例
加侵督必多流移請令守令第其災傷報觀察使更加檢覈假
如十分損七八九分則除常貢外雜徭優給義倉之粟救恤
從之○戶曹據堤堰提調單字啓一諸道堤堰今因大水決毀
必多請於秋冬之交鑿去填塞以備灌溉一堤堰無洩水木桶
則易致決毀請設水桶大堤三中堤二小堤一一堤堰左右水
道鋪石俾不決毀一遣堤堰別監摘姦違者依受 教治罪
從之○壬申 賜八番軍士酒○禮曹啓答秦盛章書曰前

者我 殿下聞道安賚傳玩球國禮幣到貴島被劫奪命問
其由今書至披陳誠懇指天為誓自辨甚力且欲親朝以啓我
殿下具悉足下之意但我國曾因足下先大人之請使掌管
南鄙諸島使船商舶點檢往來今足下主關食征實我國所命
今日承扶桑殿下之命是必不知先世事爾昌謾藏主之來數
在額外例不當納 殿下特命上朝又從其請副以佛經法器
具如別幅 殿下又以皮古汝文有勞命使往來侍衛足下亦
宜知悉○咸吉道都節制使楊汀敬差官吳伯昌馳啓因孛兒
罕與子仇難仇難之子毛多哥於會寧先時孛兒罕妻其沙哥
率子阿兒哥禿無者女子吐勞古從婢何兒河知奴及漢在富
寧青巖丑家今令鏡城判官禹貢執囚之伊升哥倍道疾馳處
處歐鞭驛吏夜至北青前川水方漲宿于川邊待水落便渡已
到吉州又令都鎮撫趙繼宗執送于京是後孛兒罕子加麟應
哈仇難子者邑哈加麟應哈子無同可奴卜刺遜亦囚會寧字
兒罕子阿比車與伊升哥子十三四歲小童加麟應哈子時郎

哥逃前此楊汀馳啓臣與康孝文吳伯昌召李兒罕父子及諸
酋于會寧召李兒罕父子就臣前開諭上旨歷數其罪李兒罕
隨辭辨明且曰前日無見哈野人喧說朝鮮兵馬入來故富寧
府使虛水刺開路事實深驚恐然木契非我造作乃傳自他人
而我亦傳送林高古家爾臣又曰東良北諸種野人因汝造言
浮動不事農業使耕種失時以至分軍候望汝之姦譎甚矣又
率徒黨彎弓欲射我所遣通事後引庚寅年事言極悖慢及通
事稱汝子伊升哥厚蒙國恩汝何敢爾則汝曰安知汝國先殺
我子而來乎其罪大矣乃令力士拘執時童亡乃金把兒歹柳
尚冬哈金多弄哈浪婁時哈浪時帖具等在坐皆失色曰李兒罕
受中國高職年又老耄請輕論臣荅曰此 上旨也非我所為
也獨柳於麟哈曰李兒罕之罪實是自作我不恐怖臣因與諸
種野人飲酒極歡而罷其後或有持酒肉來訪李兒罕者雖反
覆開諭而野人等皆驚懼不安臣從權撫安○以僉知中樞院
事宋處儉為日本國通信使行護軍李從實為副宗簿注簿李

覲為書狀官賚禮物與秀彌偕往又令賚紬三百匹白金五百
兩求買我國所無書籍等物其書契曰朝鮮國王奉書日本國
殿下秋涼想起居住勝為慰弊邦與貴國壤地相接世講鄰好
迄至于今自予即位五年於茲屢遣信使用致殷勤肆遣僉知
中樞院事宋處儉齋所求大藏經及注解諸經并土宜聊答厚
意領納為幸海波遼闊致耗良艱願益敦舊好日以尤新餘冀
為國珍重付別幅禮物大藏經一部法華經二部金剛經二部
金剛經十七家解二部圓覺經二部楞嚴經二部心經二部地
藏經二部起信論二部永嘉集二部證道歌二件趙學士書證
道歌二件高峯禪要二部翻譯名義二部成道記二部小鐘二
事雲板二隻銅鉢五部磬子五事石燈盞五事鞍子一面諸緣
具黑細麻布二十四匹白細苧布二十四匹白細綿紬二十匹藍斜
皮十張人參一百觔豹皮心虎皮邊狹皮裏坐子一事豹皮十
張虎皮十張雜彩花席十張滿花席十張滿花方席十張松子
四百觔清蜜十五斗禮曹判書洪允成奉書日本國大內多多

良公足下足下以系出我國不忘先世屢致誠款 殿下嘉之
特賜白細綿紬十匹白細苧布十匹黑細麻布十匹法華經一
部金剛經一部金剛經十七家解一部圓覺經一部心經一部
楞嚴經一部地藏經一部起信論一部永嘉集一部證道歌一
部趙學士書證道歌一部高峯禪要一部翻譯名義一虎皮
心豹皮邊狹皮裏坐子一事紅氈帽一象毛王頂子鍍金臺玉
壓纓紫綃纓具人參五十觔藍斜皮三張黑斜皮三張邊兒寢
席十五張豹皮二張虎皮四張清蜜十斗松子七十觔就付通
信使僉知中樞院事宋處儉聊示信意惟照領仍冀差人護送
且霸家臺住人等冒受諸處文引多率舛濫行出來深為未
便足下既以轄此地自今嚴立禁防以祛前弊益敦舊好幸甚
秋涼順序自愛不宣禮曹參判黃孝源奉書日本國大和守足
下秋涼想震良多社遙慰遙慰緣海路阻脩未易通問 殿下
今遣僉知中樞院事宋處儉等官前往貴國修好仍將土宜白
細綿紬五匹白細苧布五匹黑細麻布五匹邊兒寢席十張豹

皮一張虎皮二張就付前去惟照領更翼保畜禮曹判書洪允
成奉書日本國畠山修理大夫源公足下緬惟動止佳裕為慰
為慰足下遠遣信使屢輸誠懇我 殿下嘉之第緣洋海遼隔
未克通耗特賜土宜白細綿紬十匹黑細麻布十匹彩花席十
張豹皮一張虎皮二張就付通信使僉知中樞院事宋處儉聊
申信義惟照納餘翼順序自重禮曹判書洪允成奉書日本國
左武衛源公足下想起居清勝遙慰遙慰足下每遣使修誠我
殿下嘉之木道阻脩久隔音耗今因通信使僉知中樞院事宋
處儉之行特賜土宜黑細麻布十五匹白細綿紬十五匹豹皮
二張虎皮四張邊兒寢席十五張就付前去惟照領餘翼保畜
禮曹判書洪允成奉書日本國管領足下秋涼想起居清裕開
慰開慰足下遠輸誠款克敦隣好我 殿下喜悅只緣風濤險
阻不克以時通問今因通信使僉知中樞院事宋處儉之行特
賜土宜白細綿紬十匹白細苧布十匹黑細麻布十匹邊兒寢
席十五張豹皮二張虎皮四張就付前去惟照領仍翼調保禮

曹判書共允成奉書日本國京極佐佐木氏大膳大夫源公足
下秋涼遙祝動止多福足下年前春島專人遣來遠輸誠懇

殿下嘉之茲將土官白細綿紬十匹黑細麻布十匹彩花席十

張豹皮一張虎皮二張就付通信使僉知中樞院事宋處儉前

去惟照領餘真順序調重禮曹參判黃孝源奉書日本國關西

道大友源公足下自足下先世歸順我國積有年紀今足下克

紹先緒屢遣信使以輸誠款殿下良用嘉悅特賜白細苧布

五匹白細綿紬五匹邊兒寢席十張就付通信使僉知中樞院

事宋處儉前去惟照領仍翼撥船護送秋氣稍涼順序保裔禮

曹參議徐居正奉書對馬州太守宗公足下想惟起居清裕為

慰為慰我殿下差遣僉知中樞院事宋處儉等官通信貴國

經由貴州翼護送茲將不腆土宜白細苧布五匹白細綿紬五

匹黑細麻布五匹人參三十觔杉子一百四十觔邊兒寢席十

張豹皮四張粳米二十石燒酒五十瓶蜜果子五櫃茶食五櫃

清室五斗就付本使惟照領清秋荷屆順序自保禮曹佐郎金

永堅奉書日本國肥前州松浦一岐州太守志左源公足下緬
惟動止佳勝為慰為慰足下不忘舊好每遣信使遠輸誠款
殿下嘉之特賜白細苧布五匹白細綿紬五匹邊兒寢席十張
就付通信使僉知中樞院事宋處儉前去惟照領仍翼護送秋
涼順序保練禮曹佐郎金永堅奉書日本國一岐州佐志源公
足下足下每遣信使益敦舊好 殿下嘉乃誠款特賜白細苧
布五匹白細綿紬五匹邊兒寢席十張就付通信使僉知中樞
院事宋處儉前去惟照領仍翼護送秋涼以時自保○癸酉右
獻納申末舟啓讓寧大君禔就浴慶尚道東萊溫井而又欲往
全羅見其女子沐浴治病則已矣不宜枉路遨遊以煩州郡且
命於留宿之官抄給才人白丁任情獵禽才人白丁亦軍卒
也王子抄軍漸不可長 傳曰業已發行不可中止末舟又啓
禔在前日罪闕 宗社屬籍已絕幸 世宗特賜寬息今益加
厚遇賜浴湯泉已為特恩全羅道之行與聚軍獵禽之事不
宜並許 不允○御札諭咸吉道都節制使楊汀曰浪字兒罕

受恩既久而惟懷逆心造為浮言驚動諸落至於其徒彎弓向我使人又誘其子伊升哥內外相應伊升哥特受厚恩事我累年而不諫其父一朝離反托沐浴吉州而直過吉州促急欲出境李兒罕又於和解不克順命是父子情狀已甚天討所加罪不可赦今將拿來治罪慮諸部酋長不知所由或致驚恐卿宜明諭予意一浪李兒罕罪犯前日已與諸酋開說然慮猶懷驚疑卿可以今去諭書開示諸酋使洞知事由若一時招來則又慮益生驚疑卿巡行時隨其來謁開示務在不生疑阻亦宜喧說李兒罕罪狀使遠近自然聞知一李兒罕父子隨身輕貨外家產頭畜田地其所居近住最恭順聽命不為浮言所惑如把兒及等者量宜分給諭以予意○甲戌遣禮曹叅判李克培如大明賀千秋中樞院副使郭連城賀聖節○改虎翼衛為平虜衛○以尹士昕為吏曹叅判曹錫文戶曹叅判昌寧君金礦兵曹叅判上洛君郭連城同知中樞院事清平君金連枝中樞院副使蕪慶尚道都觀察使李克培漢城府尹廣陵君金淳

慶昌府尹李承召吏曹參議李孝長戶曹參議李昉工曹參議
李克堪承政院左承旨李皎然右承旨成任左副承旨金從舜
右副承旨柳子煥同副承旨許亨孫張進忠僉知中樞院事崔
漢卿司諫院右司諫大夫尹慈司憲執義李崇元宋春赫持平
朴楯司諫院左正言林得楨兼知兵曹事金世敏知中樞院事
奉朝請韓世龍中樞院副使奉朝請成得識中樞院副使上護
軍奉朝請○乙亥 御思政殿受常參內宗親宰樞承旨等入
侍 上謂順城君諲曰臺諫來言許讓寧大君沐浴東萊仍往
全羅道又於道上聚才人田獵甚為不可予荅曰今讓寧已在
道何不早言臺諫更言事實非義猶可及止臺諫所言實當然
既從尊長之請不可中止諲對曰臣似當 上教通書于父上
曰父子之情如是予何敢止仍設酌右議政申叔舟進酒啓讓
寧今往兩道所過供頓皆出於民安得無弊 上曰善哉政丞
之言謂吏曹參判尹士昕曰汝非文非武非老一年之內由承
旨為戶曹參判今遷吏曹參判福極則災生汝宜戒之出內女

奏樂誼及花川尉權恭起舞 上謂諸宗宰曰予之於叔舟若
堯舜之有稷契唐宗之有魏徵卿等以為何如僉曰誠如上
教上曰漢祖豁達多大略唐宗比漢祖差優然唐宗友之者少
是不如我予之待卿等若唐宗之待秦府僚屬叔舟曰 聖上
以公天下為心侍羣臣何有間焉○命自今都鎮撫分率軍士
入直于建春光化迎秋三門○敬差官吳伯昌拿浪伊升哥以
來 命囚義禁府 傳曰伊升哥當初請浴吉州溫井後往會
寧觀父而不入溫井經往會寧且欲往中國而不先啓達其推
鞠以聞○義禁府啓吳尚文為忠州判官時賣達川橋材木事
貲義倉穀一百三十石事以官船遭轉私處米穀收價事五寵
致死後品官等壓膝切隣人麼老事請遣朝官鞠之 從之○
丙子諭咸吉道都節制使楊汀曰孛兒罕子阿比車及伊升哥
母妻等逃未捕者皆婦幼無足慮也然隱在諸種慮生後患卿
開諭附近諸酋使之捉來捉來者厚賞之月郎哥浪將家二人
寧弓欲射通事其罪固大然其親族多不能盡捕事益滋蔓終

成釁耳又非獨此二人也隨字兒罕佩弓箭見通事者十人必
生驚疑卿宜揚言浪亭兒罕之令耳在下者何罪乎 殿下有
旨勿問使彼月郎哥浪將家及佩弓十人等聞之○義禁府啓
朴信周命寧僧一遵等亂言律應凌遲處死子年十六以上者
處絞十五以下及母女妻妾祖孫兄弟姊妹流三千里安置命
子年十六以上勿絞為奴○丁丑 御思政殿受常參視事臨
瀛大君璆桂陽君增翼峴君璉永順君溥烏山君澍河城尉鄭
顯祖右議政申叔舟兵曹參判金礪承旨等入侍設酌議作諭
楊汀事目 上與叔舟等議浪伊升哥罪叔舟曰伊升哥叛狀
已著若遲留小誅恐或有彼人為黨者疑為連累又更生事不
如速誅即 命義禁府誅伊升哥于門外遣知事金國光斬浪
亭兒罕仇羅加麟應哈阿兒哥禿無者毛多可者邑哈無同可
子所在 御扎諭汀曰卿審同封事目施行一其沙哥吐勞古
付與其兄弟之居青巖者豆稱哈等何兒河知卜刺遜火刺違
及漢給賞有功酋長一亭阿罕子及孫子逃者隨獲隨斬其妻

妾子婦勿論一亭兒罕受子厚恩位至二品遣子入侍子所特待所宜不避水火乃當和解之時以私怨忌童速魯帖木兒柳尚冬哈金把兒歹金管婁浪婁時哈等諸酋之順命殺所虜兀狄哈刺幹里使和事不成妄動浮言驚恐諸部欲生邊釁又使麾下彎弓欲射使者罪一也申叔舟受命而往招之不來罪二也與其子伊升哥相應謀叛罪三也其罪犯不可不令諸種知之明白曉諭使遠近悉知大抵明罰而寬仁只誅渠魁不令諸落生疑畏察察之政耳古語曰水清無大魚卿其體予○石城縣監崔洧上書曰甲者軍國所重不可廢也然紙鐵甲方物之獻其來尚矣今三名日方物悉改以猪皮甲不論山海俾納內廂猪皮一張之直幾至十匹猪皮雖非異土之產產處有限亦非民間所有也以官府之力尚且難支分定民戶單出童殺其弊不貲非惟猪皮為然諸物進退之權專在監造鎮撫而唯視賄賂多少是以一皮甲之費幾至五十餘匹以此推之諸色方物所入亦必倍蓰臣願革猪皮甲如不得已則依京中式例定

皮甲製造之費以除積年之弊 命下軍器監○戊寅推刷提
調啓會降 教旨自宣德七年七月初一日以後公私婢子嫁
良夫一禁犯者依律論罪犯法所生男女不可從父為良各還
官主其一品以下東西流品文武科出身生真成衆官有蔭子
孫公私婢子作妾及若平民年至四十無子者娶公私婢子所
產不在此限此法專為平民年老者更無生子之理主祀為重
而設也近者推刷時嫁良夫所生從良立案內平民嫁公賤所
生男女雖至十口並皆從良大抵雖元勳子孫適子衆子皆有
等差而平民娶賤口所生獨無差等一皆從良甚無意謂姦詐
之徒夤緣說謀巧飾誣官官吏眩於辨正公賤日減誠為可慮
請自今平民年至四十無子娶公賤所生者除承重長子外衆
子及女子一皆從賤 從之○九月庚辰朔以懿敬世子大祥
作佛事于內殿 命行大護軍金守溫左副承旨成任右弼
善洪應藝文應教盧思慎司僕少尹姜眉壽吏曹佐郎成允文叅
之以曾寫釋譜也○御書示左承旨李克堪曰治平要覽醫方

類聚皆世宗時撰集之書不可不印然治平更校之則誤處多若類聚則不必如是之多誤矣且切用非治平之所及予欲先校類聚印出治平則徐徐更校如何治平之病分房撰集取舍各異詳略不同且鄭麟趾一筆存削鹿鹿率不精一節之中雖有甚切之語例以削之雖有甚不用之語例以存之豈留心繹思為後人垂訓之意其時世宗命予盡覽予於是始覽定與予盡覽者金汶李季甸耳二人常以鄭麟趾麤略快率為恨言之然揔主者之所為不敢大有更張是故誤錯處多予知此病終置不舉實無印之之心近日卿請印布予欲使卿知其多誤使之更校卿既知多病何以處之若欲不棄先王之事宜大舉校正不然則終無印頒之理卿更商確以啓○辛巳行懿敬世子大祥祭命議立廟○下軍威縣監琴嵩于義禁府先是本縣有僧保惠與孕婦同謀殺人嵩報觀察使金淳囚保惠淳以啓命適淳遣宣傳官金堅壽拿嵩以來○壬午日本國薩摩州日向太守藤原盛久對馬州宗盛直各遣使來獻土物

○癸未 御慶會樓下觀射內宗親兵曹判書韓明澮中樞院使朴薑行上護軍金漑河原君鄭守忠承旨等入侍 命守忠進酒仍 命懿敬世子墓所供役諸司奴子等限三年勿役○左承旨李克堪上書曰臣伏承 御書反覆尋思治平要覽一書實史家之大全而前昔所無之規模也我 世宗右文興儒留心載籍凡所證定之書非一如資治訓義綱目訓義左傳韓柳文杜詩註解大小絲綸集兵要三綱行實等書非一然有關於治體而為後嗣之所觀監者一則訓義二書一則治平要覽也臣謂 先王盛意不可湮滅伏請印頒既蒙允可又承離校之命不勝欣躍退而參考則註解失次去就不精寔如聖諭此誠鄭麟趾輕率之所致也然既經聖上睿覽又經季甸金汶校定雖間有紕繆而亦無大段錯誤離校之功亦可易就不必大舉臣伏觀資治通鑑溫公之所編摩而加之以范祖禹劉恕之贊助經十九年而乃成臣觀允例及師友之間徃復尺牘用意勤矣然今觀唐末以後去就不精日月差錯者亦多有之不

惟臣之管見為然先儒亦以議之著書之難如是也然資治一書人敬之如神明仰之如日星不敢有議者以其所益多也臣謂治平一書亦如是也雖有錯誤其裒聚之廣綴集之勤用力亦大而又先王所留心之書不可棄也其在今日而不可證定則將無後日矣今威烈以上校正垂畢自宋以下請將新宋史添入刪潤又將君鑑所載大明事跡添入則渾圓大全似無欠闕自威烈以下後周以上既有資治通鑑雖間採他書而規模一樣校正之功倍加易就雖不大舉亦不過十餘朔而可訖矣醫方類聚亦醫書之大全切於日要固非治平之所及也然以斤兩之多少藥性之寒溫暑少有錯誤則害人甚大其校正之功當倍著力不可容易然其校正不必儒士臣觀醫書習讀諸人皆通曉文理熟知方書可令此輩校正乞選通儒知醫方者一人監領如近日兵要校正之例互相檢察施其賞罰則不必別立書局別廩飲啖而功亦易就臣謂二書不可皆廢伏惟聖裁 御書答之曰甚當非卿不能如是委卿布置○甲

申移 御昌德宮議政府六曹堂上問安○乙酉 御後苑分

左右鑿池 賜酒肉于役夫觀放鴟鵂○吏曹啓訓練觀參外

官無解由交割之法故然外官等專不修葺廨舍所截兵法等

書又不能着守以致破失請自今並令解由交割且習讀官因

無賞罰之典常不動仕武經亦不致意講習請令訓練提調與

兵曹考講經畫數仕日多少以為殿最三考居上者無屬處人

叙用有屬處人給別仕 從之○戶曹據高城郡事朴惟誼等

陳言啓江原道諸邑所貢生猪典廐署五十口分禮賓寺九十

七口京畿諸邑則初不分定生猪而司宰監所納乾猪只四十

八口蓋江原嶺西諸邑距京不遠至如嶺東九邑則踰大嶺轉

輸生猪甚難請於貢案以上項九邑生猪換錄京畿諸邑所貢

乾猪 從之凡諸道觀察使守令陳言者皆願罷軍資取息或

願隨土所產定貢或願下三道用踏驗或言軍丁土木錢穀利

害 上皆親覽採可取條件下該司其言僧徒恣橫者皆留不下
○丙戌賜 侍衛軍士酒肉○遣藝文直提學宋文琳賜宴于

讓寧大君提左議政姜孟卿領中樞院事李季甸于慶尚道右
贊成權擘于忠清道令本道觀察使各於所在辦之○禮曹啓
新定儀注內每月朔望朝賀 殿下具遠遊冠絳紗袍王世子
具冕服文武百官各具朝服今考諸司職掌曰文武官朝服於
大事慶成正朝冬至聖節及頒降開讀詔赦進表傳制則服之
公服於每日早晚朝奏事及侍班謝恩見辭則服之且今來奏
聞事聞見事目曰初一十五朝賀時皇帝服皮弁皂袍皇太子
具翼善冠紅袍羣臣著公服請自今依中朝之制及本國已行
格例宗親文武百官於大事慶成冬至正朝聖節迎詔頒降教
書誕日拜表外初一十五朝賀及見辭謝恩復命時並著公服
羣臣既著公服則 王世子不宜用冕服且翼善冠袞袍則
便服不可用於朝賀大事慶成正至 聖節迎詔頒降教書誕
日拜表則具冕服朔望朝日則具公服 從之○戶曹啓舊法
外方貢物諸司官吏或不精察點退則貢吏將所退之物告于
本司可退然後退之此法甚義然官吏等不拘國法外貢收納

之際妄意黜退貢吏亦矇於國法賫還本邑往復之間或致遺失改備轉輸弊亦不貲且諸司黜奴黃緣為謀雖可納之物吹毛求疵以告官吏官吏亦陷術中黜退貢吏請其司奴子代納奴子受帖而去倍蓰收價民甚病焉請自今外貢收納一依舊法本曹更審黜退具由啓聞從之○丁亥 觀獵于道峯山○戊子設耆老宴于普濟院 命左承旨李克堪賫宣醞往賜之○兵曹啓諸色軍士等憚於留京番上未幾無本官陳省上言回家例稱甲士別侍衛多占助丁累月閑遊臨遞還仕纔過十餘日而去宿衛虛踈甚為不可正統九年十二月受 教軍士等無所居乍陳省直呈上言者適差待闕前仕削除各其本品從末復屬天順元年五月受 教受祿軍士無緣故十五日有緣故四十日前銜軍士無緣故二十日有緣故五十日定限請依上項受 教軍士直呈上言回家者限內還來則削前仕還仕過限則充軍從之○己丑 御仁政殿受常參視事輪對 傳曰御正殿受常參例同朝參今後設鼓吹四拜○以窻

為樂安尹定永川尹玄原川尹李澄石知中樞院事趙秀文中
樞院副使尹岑李梓僉知中樞院事金守温尚州牧使○知敦
寧府事姜碩德卒 賜賻米豆并二十石紙一百卷棺槨油菘
等物碩德字子明晉州人蔭補啓聖殿直累除楊根郡事治為
第一遷仁壽府少尹陞司憲執義進承政院同副承旨歷戶曹
叅判司憲府大司憲吏刑二曹叅判開城留守入拜知敦寧府
事碩德性清廉慷慨高邁好古事寡母至孝待異母兄弟極其
和睦嘗語其子希顏希孟曰吾行年六十雖無功利之及人行
事無權詐則自反無愧矣居官慮事綱理甚密處家則左右圖
書焚香端坐澹然無營手作懲忿室慾四大字貼座右手不釋
卷篆隸八分墨戲俱妙詩以簡雅為宗必中古人矩度乃發至
疾亟亦令諸子讀書聽之謚戴敏典禮不愆戴好古不怠敏○
庚寅 御仁政殿設養老宴王世子及內宗親議政府六曹判
書以上承旨等入侍 賜侍衛軍士酒 傳旨吏曹曰赴宴老人
等各加一資資窮者子胥弟姪孫中一人代加年九十者超資

○戶曹啟平安黃海江原道守令開墾荒田安集流民者多若
不褒獎無以勸勵請令觀察使每歲抄錄其能墾田安集者啟
聞論賞 從之○辛卯 御內苑 命諸將用小刑名習陣○
傳旨司憲府曰奉常寺官吏今九月九日 文昭殿例薦菊花
不及進供其推鞠以聞○御書下承政院曰予即位後教書諭
書傳旨多矣觀察使守令一見之明日已忘其中赦文等一度
施行事外令觀察使刻日收諸守令則可知遵與不遵矣其議
以啓○壬辰幸箭串平觀習陣以大將許亨孫衛將金漑善
陣陞漑一資進亨孫僉知中樞院事衛將李埤金有銑坐失律
罷職○諭諸道觀察使曰令出惟行不惟反立法而不能守與
無法同何以為國予自即位以來勵精圖治期至寧謐有出於
予之獨斷而特下諭書教書者有出於有司之奏請而頒諸令
甲者條款非一中外官吏若盡心奉行豈無裨益予聞官吏因
循舊習視為文具廢閣不行者比比有之卿檢覈守令奉行與
否具錄啓達毋徒事虛文以免責譴○癸巳 召衛將都鎮撫

兵曹堂上議兵法又召奉禮郎許琮等五人講禮記護軍吳幹等十餘人講武經○兵曹啓平虜衛遼兒與他軍士不同他軍士則和會呈都目平虜衛則每道別設都目請依他例和會遷轉五品四六品八七品十二八品十五九品二十一設遼兒衆外則侍衛滿五月叅上則滿七月其中仕多者呈都目次次而陞從五品去官且下三道則閑良人數多雖不付巡察使啓本有自願入屬者觀察使節制使同議分五牌錄名啓達又於京中及他道亦有自願入屬者京中漢城府外方觀察使節制使啓聞依上項例分五牌立番從之○甲午咸吉道都節制使楊汀馳啓今承金國光賚到諭書事目若即斬孛兒罕則阿比車等在逃者終必不來今姑停行刑以孛兒罕言招阿比車待之御書諭汀曰勢不可遙度委卿處置然見卿書疑其遲決更諭予意初不待執阿比車速斬孛兒罕勿論彎弓者使諸酋長知罪止孛兒罕而自無驚惑也今若強索阿比車則諸酋之事干者皆疑將自及矣且卿以孛兒罕之言權辭招致是尤使諸

酋生不信之心也阿比車雖親子切歎執致而執之甚難雖逃之中國無妨生存作賊何畏今乃以阿比車之故而用權辭使諸酋不信一未可也又不殲巨魁使賚從疑將自及益固彼黨二未可也為彼一小豎用心太過而竟不能獲徒示彼人無威耳三未可也卿其酌量勿拘送度且金把兒歹等自疑事干勿區區強致○兵曹啓陣法云騎步並用且我國山川險阻便於用步而騎兵多步兵少請出榜知會如防牌攝六十皂隸螺匠所由喝道杖首別軍都府外諸負吏典一應京從任人有願為步兵者聽且京外閑良人及外方數外書員日守醫律學下番京役人等令京中漢城府外方兩界外諸道觀察使募壯勇可備侍衛者錄都目狀呈本曹本曹及五衛都鎮撫訓鍊觀提調同試鎗水渴間能走二百七十步者兩手各持五十斤之物能行一百六十步者彎弓百斤者二百步三矢內一矢入格者百八十步二矢入格者五才內二才入格者取之分六番每番五百人稱破敵衛屬忠佐衛立番三朔而遶遶兒則散官從六品

五正七品十從七品十五正八品二十從八品三十正九品五十從九品七十侍衛滿七朔其中仕多者呈都目次次而陞從六品去官其中有武才願屬甲士者勿論去官前後依五考三上例試騎步射滿十夫者移屬甲士隨品呈都目三從之○義柰府啓行司勇李址謀殺其兄堦罪應斬從之○乙未領中樞院事李季甸率停朝市二日官庀葬事賻米豆并七十石紙一百卷季甸韓山君穉之孫也性寬厚氣宇恢洪少登第選入集賢殿累遷承政院都承旨叅靖難佐翼功臣有子三堦坡封謚文烈博聞多見文秉德尊業烈○御書諭右贊成權擘曰時氣漸寒風烈起居如何李季甸浴後頗不調理而致不幸予益念卿母年老恐風寒乘虛則他病感萌卿亦宜不忘徃時親囑勿多出汗之語為國保重○丙申上以李季甸之率將舉哀議于政院左承旨李克堪啓上固難親臨舉哀且在殿庭以權停例拜哭亦為未可請停之從之○琉球國王遣而羅洒毛等六人日本國對馬島主宗成職遣僧昌謨等三人來獻土物

○丁酉兵曹啓公私賤口中彎弓百斤鑰壺水渴間能走二百七十步或彎弓百斤步射二百步三矢內一矢入格者稱壯勇隊本曹及五衛都鎮撫訓鍊觀提調同試自願取才者取一旅分屬忠武衛五部各一隊輪次入直其適兒用上林園職一年四都目歲末五品一六品一七品一八品一正九品二從九品二四月六品一七品一八品二正九品二從九品二七月五品一七品二八品一正九品二從九品二十月六品一八品一正九品二從九品二其中仕多者次次呈都目除授去官後公賤則已身免役私賤則以公處奴子年歲相准者聽本主自願換給已身免役上項公私賤口免役後良妻所生及以公賤而換私賤者良妻所生並許官主使用又已前侍衛公私賤口等勿更試取隨品呈都目從之○戊戌設中宮養老宴于思政院○禮曹啓崇義殿副使王循禮國家拔於民間優給土田高爵厚祿以奉先代之祀國家之恩至重今踈薄正妻昵嬖賤妾且侵虐居民恣行無忌殊無敬謹之志請令司憲府雖異其妾收循

禮告身以懲 從之○己亥 賜弼善洪應文學盧思慎佐郎

成允文少尹姜眉壽校理趙安貞奉教崔漢良待教李壽男鄭

蘭宗校勘金順命直講李永垠及司直安惠等法帖各部○以

咸禹治為中樞院副使金光粹司憲府大司憲宋文琳執義洪

甄持平○諭咸吉道敬差官康孝文曰和解事已成未刷還者

不多不必強刷其什都節制使審勢施行爾可上來○庚子賻左

叅贊朴仲孫母米豆并三十石紙一百卷油菴三部棺槨等物

○傳旨吏曹曰廣興倉仁壽府禮賓寺導官署義盈庫養賢庫

職掌錢穀久任一二員外數數遷轉甚為不可今後並皆久任

且擇諳練人差之○壬寅元良哈柳尚冬哈等三人來獻土物

○癸卯上與中宮御後苑觀射王世子及宗親議政府都鎮撫

兵曹堂上司僕承旨等入侍 賜入直軍士酒肉○咸吉道都節

制使楊汀及敬差官金國光馳啓已斬亭兒罕又捕斬仇難子

小童二人其沙哥吐勞古河兒河知授豆稱哥及漢授本主青

巖童風其妻卜刺遜火刺速留置會寧府 諭汀曰今來浪亭

兒宰等論刑書狀已悉但會寧近處住金波乙及等自疑者不
必督令上京從其所欲可也前日以浪寺兒罕家人賞給波乙
及等同里人有自疑之勢不必強致賞給卿觀其情勢斟酌施
行○甲辰琉球國王遣使來獻土物○乙巳命收官官尹得
富告身以得富檢察捕鷹往咸吉道放肆橫行也○禮曹啓懿
敬世子廟稱孝靖廟慕稱懿墓朔望祭四仲月有名日別祭忌
日祭子孫年長奉祀間姑令宗親及功臣子弟內三品官行祭
其奠物奉常寺仍掌設從之○賻坡平君尹巖母米豆并三
十石棺槨等物○丙午幸麻浦御淡淡亭觀唐舩仍放諸
色火炮賜右議政申叔舟米五十石內廐馬一匹○丁未御
後苑用小形名習陣仍觀射宗親及議政府六曹都鎮撫衛將
承旨等入侍○諭咸吉道都節制使楊汀都觀察使鄭軾曰及
草未枯多獲海青無如今年足見卿之用心也茲遣內官李存
賜宴及衣一襲卿知予意并賜存衣一襲以存亦與捕鵲也○
兀良哈護軍柳於麟可子尼應加大等十人來獻土物○戊申

幸慕華館王世子及宗親宰樞隨駕令宗親宰樞兼司僕內禁
衛射候以新宗正孝伯及崔適善射各進一階觀甲乙槍放砲
射毛毬手搏戲引見野人柳尚冬哈等三人賜尚冬哈衣及鞍
具馬刀子弓矢於致巨所應大等紅絲帶刀子絲囊藥物賜
侍衛軍士酒

世祖惠莊大王實錄卷第十七

(B)
732.55
4724
[v.7]
no.6
0163743

昭和五年十月五日印刷
昭和五年十月十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)
732.55
4724
[v.7]
no.6